

直隸秦州新志

第八冊

卷之十上

人物



直隸秦州新志卷之十

人物 聖皇附前 列女附後

選舉之後標人物猶官師之後標名宦也人物不盡於選舉猶名宦不盡於官師也是固然矣顧其叙次煩簡之方門逕分合之故所見或殊請通商權舊志因羲軒立聖皇紀因唐高祖太宗立皇帝紀因漢孝昭皇后立后妃紀皆在人物以外者也慎重則然而殊疑煩碎康對山之志武功也后稷聖人唐祖太宗帝王俱收之人物不另標題或疑

直隸秦州新志

卷之十 人物

其襄對山曰太華高羣山倚重奚襄哉今取以爲法卽用羲黃冠人物焉又舊志人物於正傳以後復有文苑孝義等傳此史例也史以有勲業者爲大傳其餘偏至乃分品目然史固無人物之目也旣稱人物則德成而上藝成而下雖義無虛美而事非一局今別文苑孝義於後豈能孝能文尙不可稱人物乎此名實之乖也且此地名數最古賢豪間出羲黃尙已漢唐之際文武彬彬焉迄今下衰仕宦功名亦復寥落作志者輒取鄉里善人以



充人物之數夫使鄉里善人巍然高踞其前而漢之李少卿趙元叔唐之權士繇乃抑而置之其下曰不過文苑孝義而已其誰服之此輕重之反也今故盡削諸目止次時代使觀者卽其事以定其人人而風雅是名文苑人物人而純篤是名孝義人物推而上至聖賢是卽聖賢之人物下至方伎是卽方伎之人物而已矣旣息紛煩之門復絕乖反之轍不亦可乎志人物第十列女亦人物也卽附後列女專載節烈舊志固然也已旌者其人尚直隸秦州新志

卷之十 人物

二

存必錄尊 國典也未旌者旣死而後錄蓋棺論定也亦有未死而錄之者其節尤苦也排纂舊志博采新聞凡如干人著於篇

上古

太皞庖犧氏風姓代燧人氏繼天而王母曰華胥履大人迹於雷澤而生庖犧於成紀蛇身人首有聖德仰則觀象於天俯則觀法於地旁觀鳥獸之文與地之宜近取諸身遠取諸物始畫八卦以通神明之德以類萬物之情造書契以代結繩之政於是始制嫁



娶以儷皮爲禮結網罟以教佃漁故曰宓犧氏養犧  
牲以庖厨故曰庖犧有龍瑞以龍紀官號曰龍師作  
二十五弦之琴木德王女媧氏亦風姓蛇身人首有  
神聖之德代宓犧立號曰女希氏無草造惟作笙簧  
故易不載不承五運

可泉舊志稱媧皇成紀人今其  
生處或云秦州之三陽川或云

秦安之隴城

黃帝者少典國君之子母曰附寶感電光繞斗而有  
娠生帝於軒轅之邱名曰軒轅

今清水縣有軒轅谷  
史紀正義云生壽邱

直隸秦州新志

卷之十 人物

三

神農氏弗能征於是軒轅乃習用干戈以征不享諸  
侯咸來賓從而蚩尤最爲暴莫能伐軒轅乃修德振  
兵治五氣藝五種撫萬民度四方教熊羆貔貅羆虎  
以與炎帝戰於阪泉之野三戰然後得其志與蚩尤  
戰於涿鹿之野禽殺之諸侯咸尊軒轅爲天子代神  
農氏是爲黃帝天下有不順者黃帝從而征之平者  
去之披山通道未嘗寧居遷徙往來無常處以師兵  
爲營衛官名皆以雲命爲雲師置左右大監監於萬  
國獲寶鼎迎日推策舉風后力牧帝先大鴻以治民



順天地之紀幽明之占死生之說存亡之難時播百穀草木淳化鳥獸蟲蛾旁羅日月星辰水波士石金玉勞勤心力耳目節用水火材物有土德之瑞故號黃帝

附

唐高祖神堯皇帝諱淵字叔德姓李氏隴西成紀人也其七世祖暲當晉末據秦涼以自王是爲涼武昭王暲生歆歆爲沮渠蒙遜所滅歆生童耳魏宏農太守重耳生熙金門鎮將戍於武川因畱家焉熙生天直隸秦州新志

卷之十

人物上

四

賜爲幢主天賜生虎西魏時賜姓大野氏官至太尉與李弼等八人佐周代魏有功皆爲柱國號八柱國家周閔帝受魏禪虎已卒乃追錄其功封唐國公諡曰襄襄公生昞襲封唐公隋安州總管柱國大將軍卒諡曰仁仁公生高祖於長安體有三乳性寬仁襲封唐公隋文帝命復姓李氏以爲千牛備身譙隴二州刺史大業中歷岐州十一年拜山西河東撫慰大使平龍門絳州賊擊退突厥十三年拜太原畱守破高陽賊時隋帝南遊江都天下皆盜唐公子世民知



隋必亡陰結豪傑與晉陽令劉文靜謀舉大事數以  
大計動唐公五月起義兵六月傳檄諸郡七月晉衆  
發太原八月敗隋將宋老生於霍邑下臨汾絳郡九  
月濟河狗關中羣盜悉降十月圍長安十一月克之  
立隋代王侑爲皇帝改元義寧遙尊隋帝爲太上皇  
自爲大丞相封唐王次年二月太上皇被弒於江都  
五月隋帝禪位唐王王卽皇帝位國號唐改元武德  
自武德元年至六年隋末羣盜據州郡盜名字者以  
百十計或降或誅其最盛者薛舉竇建德王世充劉  
直隸秦州新志

卷之十

人物上

五

武周劉黑闥之屬秦王世民先後皆破平之天下  
統九年立秦王爲太子卽內禪稱太上皇太宗貞觀  
九年崩廟號高祖武功志兼紀高祖太宗太宗生於  
武功故也舊秦州志兼紀高祖太  
宗殆謂高祖之業實太宗所成又貞觀致治之盛故  
也予竊意州志所重止在表明李唐一代是隴西成  
紀人故首叙世系必不容略若於皇帝之中拘人物  
之例又取功德則開元之全盛元和之中興會昌之  
平澤潞大中之復河隍宜悉  
紀之矣故於太宗謹略之

周

秦祖字子南鄭元曰壤駟赤字子徒鄭元曰石作蜀

字子明史紀無注闕里志三人者皆孔子弟子按孔子時



岐豐皆已入秦則未知秦是秦州與否然宋封石作  
蜀成紀侯亦封壤駟赤上邽侯則二人之爲秦州或  
有據惟秦祖唐封少梁而宋封鄠城與秦  
州無與耳鄭氏旣云秦人姑依舊志存之  
漢

紀信成紀人漢初爲將軍從漢王在滎陽楚攻之急  
信請曰臣請誑楚可以間出於是夜出女子東門四  
千餘人楚因四面擊之信乃乘王車黃屋左纛言食  
盡漢王降楚楚皆呼萬歲之城東觀漢王乃與數十  
騎出西門遁項羽見信問漢王安在曰已出去矣羽

怒燒殺信於史無考舊志云是此州人或云華州人

直隸秦州新志 卷之十 人物上 六

李廣隴西成紀人其先李信爲秦將逐得燕太子丹  
者也廣世世受射孝文十四年以良家子從軍擊胡  
用善射殺首虜多爲郎騎常侍數從射獵格殺猛獸  
文帝曰惜廣不逢時令當高祖世萬戶侯豈足道哉  
景帝時爲上谷太守數與匈奴戰典屬國公孫昆邪  
爲上泣曰李廣材氣天下無雙自負其能數與虜確  
恐亡之乃徙上郡匈奴入上郡有射鵰者三人廣從  
百騎往馳之自射殺其二生縛其一會匈奴數千騎  
至廣之百騎大恐欲馳還廣令其騎轉前未到敵陣



二里所皆下馬解鞍有白馬將出護兵廣上馬率數十騎馳射殺之復還解鞍臥匈奴怪之弗敢擊夜半引去後又徙隴西北地雁門雲中太守歷諸邊郡屢出擊胡行無部曲行陣就善水草頓舍人人自便不擊刀斗自衛莫府省文書但遠斥候未嘗遇害匈奴畏之士卒亦樂從武帝卽位召入爲未央尉後復以衛尉爲將軍出雁門擊匈奴軍敗議罪贖爲庶人居無何復拜右北平太守匈奴號曰漢飛將軍避之數歲不入界初廣與從弟李蔡俱爲郎事文帝景帝時直隸秦州新志

卷之十

人物上

七

蔡積功至二千石武帝元狩二年代公孫宏爲丞相蔡爲人名聲出廣下遠甚然廣不得爵邑官不過九卿歷七郡太守前後四十餘年得賞賜輒分其麾下飲食與士卒共之家無餘財將兵乏絕處見水土卒不盡飲不近水不盡餐不嘗食寬緩不苛士以此愛樂爲用其射見敵非在數十步之內度不中不發發卽應弦而倒元狩四年大將軍驃騎將軍大擊匈奴廣數自請行上以爲老不許良久乃許之以爲前將軍而陰戒大將軍謂廣老數奇毋令當單于大將軍



出塞捕虜知單于所居廼自以精兵走之而令廣并於右將軍出東道惑失道後大將軍大將軍使長史持糒醪遺廣因問失道狀曰青欲上書報天子失軍曲折廣未對大將軍長史急責廣之幕府上簿廣曰諸校尉亡罪乃我自失道吾今自上簿至幕府謂其麾下曰廣結髮與匈奴大小七十餘戰今幸出接單于而大將軍徒廣部行何遠又迷失道豈非天哉且廣年六十餘終不能復對刀筆之吏矣遂引刀自刎百姓聞之皆爲垂泣明年李蔡以丞相坐侵孝景園直隸秦州新志

卷之十

人物上

八

壻當下吏治亦自殺不對獄廣三子曰當戶椒敢皆爲郎上與韓嫣戲嫣少不遜當戶擊嫣嫣走於是上以爲能當戶蚤死乃拜椒爲代郡太守皆先廣死廣死軍中時敢從驃騎將軍擊胡左賢王力戰奪旗鼓斬首多賜爵關內侯代廣爲郎中令當戶有遺腹子陵

陵字少卿少爲侍中建章監善騎射愛人謙讓下士甚得名譽武帝以爲有廣之風使將八百騎深入匈奴二千餘里還拜爲騎都尉將勇敢五千人教射酒



泉張掖天漢二年貳師將三萬騎出酒泉擊右賢王於天山召陵欲使爲貳師將輜重陵召見武臺卽頭自請曰臣所將屯邊者皆荆楚勇士奇材劍客也願得自當一隊以少擊衆步兵五千人涉單于庭上壯而許之於是將其步卒五千人出居延北行三十日至浚稽山與單于相值騎可三萬圍陵軍陵搏戰攻之千弩俱廢應弦而倒虜還走上山漢軍追擊殺數千人單于大驚召左右地兵八萬餘騎攻陵陵且戰且引南行數日抵山谷中連戰士卒中矢傷三創者

直隸秦州新志

卷之十 人物上

九

載輦兩創者將軍一創者持兵戰明日復戰斬首三千餘級引兵東南循故龍城道行四五日抵大澤葭葦中復殺虜二千餘人虜不利欲去會陵軍候管敢爲校尉所辱亡降匈奴言其實單于大喜遂遮道急攻陵居谷中虜在山上四面射矢如雨下漢軍南行未至鞬汗山一日五十萬矢皆盡卽棄車去夜半陵上馬壯士從者十餘人虜騎數千追之陵曰無面目報陛下遂降陵敗處去塞百餘里邊塞以聞上以問太史令司馬遷遷盛言陵事親孝與士信常不顧身



以殉國家之急其素所畜積也有國士之風彼之不  
死實欲得當以報漢也初上遣貳師大軍出財令陵  
爲助兵及陵與單于相值而貳師功少上以遷誣罔  
欲沮貳師爲陵游說下遷腐刑久之上悔陵無救迺  
遣使勞賜陵餘軍得脫者陵在匈奴歲餘上遣因杆  
將軍公孫敖將兵深入匈奴迎陵無功還乃聽安言  
謂陵教單于爲兵以備漢上於是族陵家盡誅陵母  
弟妻子頃之蘇武使匈奴匈奴固欲降武使陵數譬  
曉之武固不可陵嘆曰嗟乎義士陵罪適於天矣賜  
直隸秦州新志

卷之十 人物上 十

武牛羊數十頭居數歲漢與匈奴和武當歸陵置酒  
別武起舞作歌泣下數行因與武決世傳陵與武贈  
答詩數篇謂五言詩起於此云

趙弟上邽人以騎士從貳師將軍破宛歸至郁成郁  
成王城守不肯給食且攻殺漢校尉貳師攻破郁成  
其王走康居遣騎逐得之弟卽拔劍斬郁成王軍還

封新時侯

清水志有趙破奴  
據漢書云太原人

狄山天水人武帝時爲博士匈奴請和親召羣臣議  
山曰和親便兵者凶器未易數動今自陛下舉兵擊



匈奴中國以空虛邊民大困貧由此觀之不如和親  
上以問御史大夫張湯湯曰此愚儒無知山曰臣固  
愚忠若湯乃詐忠上方信向湯山驟詆之上大怒使  
山乘鄣爲匈奴所害

王莽字稚叔天水人昭帝初爲右將軍時燕王旦謀  
逆與其姊蓋長公主通謀主報旦言所患獨大將軍  
霍光與右將軍王莽會莽卒旦逆謀遂決

趙充國字翁孫隴西上邽人初以良家子善騎射補  
羽林爲人沈勇有大略少好將帥之節而學兵法通

直隸秦州新志

卷之十 人物上

十一

知四夷事武帝時以假司馬從貳師將軍擊匈奴大  
爲奴所圍充國廼與壯士百餘人潰圍陷陣貳師引  
兵隨之遂得解身被二十餘創帝親視其創拜中郎  
昭帝時平武都氏復擊匈奴有功拜後將軍復與霍  
光定冊立宣帝封營平侯後光祿大夫義渠安國使  
行諸羌先零豪言願時渡湟水北畜牧安國以聞充  
國劾安國奉使不敬是後羌人旁緣前言抵冒渡湟  
水郡縣不能禁元康三年先零遂與諸羌種豪二百  
餘人解仇交質盟詛上聞之以問充國對曰羌人所



以易制者以其種自有豪數相攻擊勢不壹也匈奴欲與羌合非一世也臣恐羌變未止此且復結聯他種宜及未然爲之備於是兩府復白遣義渠安國行視種羌分別善惡安國以騎都尉將騎三千屯備羌至浩亶爲虜所擊失亡車重兵器甚衆是歲神爵元年春也時充國年七十餘上老之使御史大夫丙吉問誰可將者充國對曰亡踰於老臣者矣上遣問焉曰將軍度羌虜如何常用幾人充國曰百聞不如一見兵難喻度臣願馳至金城圖上方略充國至金城直隸秦州新志

卷之十 人物上 五

須兵滿萬騎欲渡河恐爲虜所遮卽夜遣三校銜枚先渡渡輒營陣會明畢遂以次盡渡虜數十百騎來出入軍傍充國令軍勿擊常以遠斥侯爲務行必爲戰備止必堅營壁尤能持重愛士卒先計而後戰遂西至西部都尉府日饗軍士士皆欲爲用虜數挑戰充國堅守計欲以威信招降罕开及刼略者解散虜謀徼極廼擊之時酒泉太守辛武賢奏欲用兵天子下其書充國令與校尉以下吏士知羌事者博議充國及長史董通年上議辨天子復下其書公卿皆主



武賢上嘉納之乃以書勅議充國充國既得讓以爲  
將任兵在外便宜有守以安國家迺上書謝罪因陳  
兵利害其秋充國病上賜書問之遂上屯田奏充國  
奏每上上輒下公卿議初是充國計者什三中什五  
最後什八有詔詰前言不便者皆頓首服上以武賢  
等數言當擊又因充國屯田處離散恐虜犯之兩從  
其計詔武賢等出擊得數千級而充國所降復得五  
千餘人詔罷兵獨充國留屯田明年五月充國乃請  
罷屯兵奏可充國振旅而還後數處置羌事利害皆

直隸秦州新志

卷之十 人物上

三

如所策甘露二年薨年八十六諡壯侯子印以功拜

中郎將

舊志有幸武賢狄道人也今不載又有范明友隴西人以家世習外國事使護西羌昭帝

時爲度遼將軍封平陵侯考霍光傳不注明友何處人亦不敢載

段會宗字子松天水上邽人也竟寧中以杜陵令五

府舉爲西域都護騎都尉西域敬其威信三歲更盡

還拜爲涿郡太守以軍于當朝徙爲雁門太守數年

坐法免西域諸國上書願得會宗陽朔中復爲都護

會宗爲人好大節矜功名與谷永相友善谷永閱其

老復遠出予書戒之會宗旣出諸國遣子弟郊迎小



昆彌安日前爲會宗所立德之欲往謁諸翎侯止不聽遂至龜茲歲餘小昆彌爲國民所殺諸翎侯大亂徵會宗爲左曹中郎將光祿大夫使安輯烏孫立小昆彌兄末振將定其國而還明年末振將殺大昆彌會病死漢恨誅不加元延中復遣會宗發戊己校尉諸國兵卽誅末振將太子番邱會宗恐大兵入烏孫驚番邱逃亡不可得卽留所發兵墊婁地選精兵三十弩徑至昆彌所在召番邱責以末振將骨肉相殘殺漢公王子孫未伏誅而死使者受詔誅番邱卽手直隸秦州新志

卷之十

人物上

西

劍擊殺番邱官屬以下驚恐馳歸號泣罷去會宗還奏事公卿議會宗權得便宜宜明國威宜加重賞天子賜會宗爵關內侯黃金百斤復遣安輯烏孫明年病死烏孫中年七十五矣城郭諸國爲發喪立祠焉

東漢段熲會宗從曾孫舊志亦列之考其傳云姑臧人也今移之名宦

東漢

錫光略陽人爲交阯太守教民以禮義風俗漸變王莽篡位據郡不附光武卽位遣使歸順焉帝嘉其忠節拜大將軍

於史無考舊志亦無而省志有之或別有據耶



楊子阿成紀人善相馬傳之伏波將軍馬援語見援傳

郭整略陽人博洽多聞抱道自重安帝順帝之世公府八辟公車五徵皆不就

任棠漢陽人抱奇隱居事見名宦龐參傳

姜岐上邽人守道隱居名聞西州漢陽守橋元召以爲吏稱疾不就元怒勅督郵尹益偪致岐堅臥不起士大夫競往諫元元乃止

尹嘉漢陽人靈帝時爲祿福長祿福烈女趙娥親報

直隸秦州新志

卷之十

人物上

五

父仇手刃縣民李壽自詣獄嘉縱使去卽解印綬去官

趙壹字元叔漢陽西縣人也體貌魁梧望之甚備而恃才倨傲爲鄉黨所擯乃作解擯又作刺世疾邪賦以舒其怨光和元年舉郡上計到京師是時司徒袁逢受計壹獨長揖而已逢望而異之令左右往讓之曰下郡計吏而揖三公何也對曰昔酈食其長揖漢王今揖三公何遽怪哉逢則歛衽下堂執其手延置上坐因問西方事大悅顧謂坐中曰此人漢陽趙元



叔也朝臣莫有過之者吾請爲諸君分坐坐者皆屬  
觀旣出往造河南尹羊陟延與語大奇之執其手曰  
良璞不剖必有泣血以相明者矣陟乃與袁逢共稱  
薦之名動京師士大夫想望其風采爭致禮命十辟  
公府並不就終於家著賦頌箴誄書論及雜文十六  
篇

周秘

英雄記  
作忠

字仲遠漢陽人獻帝初爲吏部尚書時

董卓弄權任用秘及侍中伍瓊等又以尚書韓馥等  
爲諸州刺史馥等到官各舉義兵討卓秘瓊陰爲內

直隸秦州新志

卷之十 人物上

六

王卓聞兵起欲遷都長安秘瓊固以爲不可卓大怒  
曰卓初入朝二子勸用善士故相從而諸君到官舉  
兵相圖此二君賣卓卓何用相負遂害之

李翕字伯都阿陽人嘗令澠池歷守三郡史逸其蹟

考之澠池武都之碑蓋良吏也

可泉秦  
安志

清水志有王丹考本傳京兆下邳人也今  
不載又有楊廣事見後隗囂篇中亦不載

魏

閻溫字伯儉天水西城人也以涼州別駕守上邳令  
馬超走奔上邳郡人任養等舉衆迎之溫止之不能



禁乃馳還州超復圍州温夜從水中潛出明日賊見其跡遣人追遮之於顯親界得温執還詣超超解其縛謂曰今成敗可見足下若從吾言反謂城中東方無救此轉禍爲福之計也不然今爲戮矣温僞許之超乃載温詣城下温向城人呼曰大軍不過三日至勉之城中皆泣稱萬歲超怒切責之温曰夫事君有死無二而卿乃欲令長者出不義之言吾豈苟生者乎超遂殺之

温傳後附張叅父子不言爲何許人明而附會之與姑闕之以俟博雅

直隸秦州新志

卷之十

人物上

七

薛夏字宜聲天水人博學有才魏武宿聞其名甚禮遇之後文帝雅重其才黃初中爲秘書丞每呼薛君而不名夏甚貧嘗顧其衣薄解御袍賜之征西將軍曹休來朝帝引入座顧謂休曰此君秘書丞天水薛宜聲也其見遇如此

史未有考省志確鑿如此或別有據存之舊志又有後漢姜維及魏楊阜趙昂三人皆天水真人與卽今伏羲在當時爲涼州治而今不屬秦州姑闕之且此三人者亦夫人而知之者也

晉

閻鼎字台臣天水人初以豫州刺史屯許昌遭母喪



欲還鄉里值京師失守秦王出奔密中司空荀藩藩弟司隸校尉組及中領軍華恒河南尹華蒼在密縣建立行臺以鼎有才用且手握疆兵勸藩假鼎冠軍將軍豫州刺史蔚等爲叅佐鼎遂奉秦王行至藍田立王爲皇太子登壇告天立社稷宗廟以鼎爲太子詹事總攝百揆梁綜與鼎爭權鼎殺綜以王毗爲京兆尹鼎首建大謀立功天下始平太守麴允撫夷護軍索綝並害其功且欲專權乃證其有無君之心專戮大臣請討之遂攻鼎鼎出奔雍爲氏寶首所殺

舊志

直隸秦州新志

卷之十

人物上

六

有陳安安反覆亂人事見兵戎及雜記中又孝義傳言徽縣有傳祗傳引之考三國志祗父嘏北地泥陽人引之于史無考

楊軻天水人也少好易長而不娶學業精微養徒數百常食鹿飲水衣褐緼袍人不堪其憂而軻悠然自得劉曜僭號徵拜太常軻固辭不起曜亦敬而不逼遂隱於隴山及石季龍嗣偽位備元纁束帛安車徵之軻以疾辭迫之乃發既見季龍不拜與語不言命舍之于永昌乙第季龍欲觀其真趣乃密令美女夜以動之軻蕭然不顧又使人將其弟子盡行遣魁壯



羯士衣甲持刀臨之以兵并竊其所賜衣服而去軻  
視而不言了無懼色時咸以爲焦先之徒未有能量  
其深淺也後求還季龍送以安車蒲輪蠲十戶供之  
因歸秦州仍教授不絕其後秦人西奔涼州軻弟子  
以牛負之爲戍軍追擒并爲所害

舊志有董京考史云不知何許人

郭荷字承休略陽人整之六世孫明究羣籍特善史  
書不應州郡之命張祚遣使者以安車束帛徵爲博  
士祭酒使者迫而致之及至署太子友荷上疏乞還  
祚許之遺以安居蒲輪送還張掖東山年八十四卒  
直隸秦州新志

卷之十

人物上

九

謚曰元德先生

苻雄字元才天水略陽臨渭氏洪季子堅之父也

洪堅

詳後雜記

少善兵書多謀略好施下士有政術兄健僭位

爲佐命元勳權侔人主而謙恭奉法健常曰元才吾  
姬旦也及卒健哭之歐血曰天不欲吾定四海耶何  
奪吾元才之速也

苻融字博休堅季弟也少魁偉美姿度健封安樂王  
融固辭健深竒之及長令譽彌高爲朝野所屬堅立  
拜侍中聰明辨慧下筆成章耳聞則誦過目不忘嘗



著浮圖賦世咸珍之銓綜內外刑政修理尤善斷獄  
奸無所容堅及朝臣雅皆欽服性至孝初留冀州遣  
使參問其母動止或日有再三融爲將善謀略好施  
愛士專方征伐必有殊功堅旣有意荆揚時慕容垂  
姚萇等說堅以平吳封禪之事融每諫曰江東雖不  
絕如縑然天之所相終不可滅堅弗納遂及於敗  
苻朗字元達堅從兄子也性宏達神氣爽邁勿懷遠  
操不屑時榮堅目之曰吾家千里駒也及爲方伯有  
若素士耽翫經籍手不釋卷在任甚有稱績後晉伐  
直隸秦州新志

卷之十

人物上

二十

青州朗遣使詣謝元於彭城求降元表朗許之旣至  
揚州風流邁於一時善識味鹹酢及肉皆別所由或  
殺雞以食之旣進朗曰此雞栖恒半露又食鵝肉知  
黑白之處檢之皆驗著苻子數十篇行於世

權翼略陽人其先殷武丁之子封於權周衰入楚爲  
權氏徙秦而居天水翼初爲姚襄叅軍後仕秦苻堅  
爲給事黃門侍郎與北海王猛太原薛讚並稱王佐  
之才堅令共典機密及堅將伐晉翼進諫曰晉祚雖  
微未聞喪德君臣和睦上下同心謝安桓冲皆江表



偉人未可圖也堅不納伐晉敗歸慕容垂請往鄴展墓堅許之翼諫曰垂猶鷹也饑則附人飽便高颺惟宜急其羈絆不可任其所欲堅復不聽已而垂叛於鄴慕容泓等叛於關中堅始用其言而已無及矣翼號曰安邱公

姜平子天水人苻秦時爲秦州別駕堅饗羣臣皆賦詩平子詩有丁字直而不曲堅問其故曰臣丁至剛不可以屈且曲下者不正之物未足獻也堅笑曰名不虛行因擢上第

直隸秦州新志

卷之十 人物上 五

呂婆樓略陽氏人也其先呂文和漢文帝初自沛徙焉世爲酋豪梁平老亦略陽氏也苻生僭立以婆樓爲侍中尚書平老爲特進苻堅將廢生謀之婆樓婆樓曰僕不足以辦大事里舍有王猛者謀略不世出宜請而咨之堅因婆樓以招猛一見大悅旣廢生堅以婆樓爲司隸校尉平老爲右僕射王猛薛讚皆爲中書侍郎與權翼並掌機密除生苛政秦大治婆樓官至太尉子光詳後雜記

王嘉字子年隴西安陽人也隱於東陽谷鑿崖穴居



弟子受業者數百人亦皆冗處石季龍之末棄其徒  
衆至長安潛隱於終南山結菴廬而止門人聞而復  
隨之乃遷於倒獸山苻堅累徵不起堅將南征遣使  
者問之嘉曰金剛火疆乃乘使者馬正衣冠徐徐東  
行數百步而策馬馳反脫衣服棄冠履而歸下馬踞  
牀一無所言使者還告堅不悟復遣問之曰吾世祚  
云何嘉曰未央咸以爲吉明年癸未敗於淮南所謂  
未年而有殃也姚萇之入長安禮嘉如苻堅故事逼  
以自隨每事諮之萇旣與苻登相持問嘉曰吾得殺  
直隸秦州新志

卷之十

人物上

五

苻登定天下不嘉曰略得之萇怒曰得當云得何略  
之有遂斬之及萇死萇子興字子略方殺登略得之  
謂也嘉之死日人有隴上見之其所造牽三歌讖事  
過皆驗累世猶傳之又著拾遺錄十卷其記事多詭  
怪今行於世

尹緯字景亮天水人也少有大志每覽書傳至宰相  
立勲之際常輟書而歎苻堅以尹赤之降姚襄諸尹  
皆禁錮不仕緯晚乃爲吏部令史及姚萇奔馬牧緯  
與尹詳龐演等推萇爲盟主遂爲佐命元功萇旣敗



符堅遣緯說堅求禪代之事堅問緯曰卿於朕何官  
緯曰尚書令史堅歎曰宰相才也王景略之儔而朕  
不知卿亡也不亦宜乎長死緯與姚興滅苻登成興  
之業皆緯之力也

宋尹冲死節其傳云  
天水冀人也故略之

姜龕天水人經明行修門徒數百姚興時教授長安  
興聽政之暇每引龕講論道藝錯綜名理

姜岌天水人明於象數後秦姚興時當孝武太元九  
年歲在甲申岌乃造三紀甲子元歷

梁 後梁附

直隸秦州新志

卷之十 人物上

三

楊公則字君翼天水西縣人未弱冠隨父在軍中父  
戰死公則冒陣抱尸號哭氣絕良久徒步負喪歸由  
此著名後領白馬戍主氏賊李烏奴作亂攻白馬公  
則固守經時矢盡糧竭陷於寇杭聲罵賊烏奴壯之  
要與同事公則僞許而圖之謀泄逃歸齊高帝下詔  
褒美歷數郡太守清潔自持從梁高祖起義大軍至  
新林公則嘗登樓望戰城中遙見麾蓋縱神鋒弩射  
之矢貫胡床左右皆失色公則曰幾中吾脚談笑如  
初東昏夜選勇士攻公則柵軍中驚擾公則堅臥不



起徐命擊之東昏軍乃退進號左將軍還鎮湘州輕刑薄歛爲吏民所悅時朝廷始議北伐詔公則假節先屯洛口公則受命邁疾謂親人曰馬革還葬此吾志也遂疆起登舟至洛口前鋒接戰卽破敵兵會疾卒謚曰烈公則爲人敦厚慈愛居家篤睦視兄子過於其子家財悉委焉性好學雖居軍旅手不輟卷尹正其先天水人後梁宣帝蕭警初蒞雍州正爲其府中兵叅軍擒張纘獲杜岸皆正之力及稱帝進正位柱國封新野縣侯卒謚曰剛配食警廟于德毅多直隸秦州新志

卷之十 人物上 三

權略官至大將軍

陳

趙知禮字齊旦天水隴西人涉獵文史善隸書陳高祖初引爲記室叅軍歷官黃門侍郎陳受命累進官天嘉元年進爵爲伯知禮沈靜有謀謨每軍國大事

世祖輒令璽書問之累官領前軍將軍卒謚曰忠隴

自東漢徙襄武大槩與今秦州無涉官師人物載隴西皆似枝指然疑不能明不敢徑刪趙又天水望也聊復存之又考宋齊地理志南朝亦自有天水隴西有西縣則揚公則尹正趙知禮尙不知何許人也姑存之



元魏

趙逸字思羣天水人也好學夙成仕姚興歷中書侍郎神鼎三年三月上巳帝幸白虎殿命百寮賦詩逸製詩序時稱爲善久之拜寧朔將軍赤城鎮將綏和荒服十有餘年百姓安之年踰七十手不釋卷凡所著述詩賦銘頌五十餘篇逸兄溫字思恭博學有高名姚泓天水太守劉裕滅泓遂沒於氏氏王楊盛盛子難當旣有漢中以溫爲輔國將軍秦涼二州刺史及難當稱蕃世祖以溫爲難當府司馬長子廣夏中直隸秦州新志

卷之十

人物上

五

書博士第三子瑛

瑛字叔起遭亂乳母攜奔壽春年十四乃歸孝心色養能熟之節必親調之皇興中京師儉婢簡粟糶之瑛遇見切責勸留輕糶嘗送子應冀州娉室從者於路遇得一羊行三十里而瑛知之令送於本處又過路傍主人設羊羹瑛訪知盜殺卒辭不食遣人買却刃得剩六耜卽令送還刃主刃主高之義而不受瑛命委之而去初爲兗州司馬轉團城鎮副將還京爲淮南王他府長史時禁制甚嚴不聽越關葬於舊兆



琰積三十餘年不得葬二親及蒸嘗拜獻末曾不嬰  
慕卒事每於時節不受子孫慶賀慨歲月推移遷窆  
無期乃絕鹽粟斷諸滋味食麥而已年八十卒遷都  
洛陽子應等乃還鄉葬焉應弟煦字賓育好音律以  
善歌聞於世位秦州刺史

逸伯父遷爲姚萇尚書卒長安劉裕滅姚泓徙遷子  
孫於建業遷元孫翼翼從子超宗令勝遐叔隆穆等  
魏太和景明中相尋歸魏翼翼粗涉書傳通率有器藝  
初爲平昌太守甚有治稱遷光祿大夫卒

直隸秦州新志



卷之十

人物上

三

超宗身長八尺頗有將略太和末爲豫州平南府長  
史帶汝南太守後累遷官終河東太守初在汝南多  
所受納比官河東更自修厲清靖愛民百姓追思之  
遐初爲軍主以戰守功封牟平縣開國子後以輔國  
將軍出守滎陽時梁將馬仙琕攻圍朐城詔遐與劉  
思祖等救之仙琕見遐營壘未就徑來逆戰思祖望  
陳先退遐以孤軍奮擊獨破仙琕斬其軍主數人仙  
琕先分軍於朐城西阻水列柵以圍固城遐身自潛  
行觀水淺深結草爲筏銜枚夜進破其六柵圍遂解



而胸城守者力竭降梁援軍多潰遐獨握節還猶坐

失利免官延昌中復起歷官終汾州刺史楊機最有功名尹挺

由南齊歸魏亦有功名而其傳皆云天水人故皆闕之時天水人閻慶與挺同歸魏

姜儉字文簡天水人少有幹用勤濟過人起家徐州

車騎府田曹參軍轉太尉外兵參軍蕭寶寅出討關

西引為開府屬軍機謀略多所參預儉亦自謂遭逢

知己遂竭誠委託寶寅為雍州仍請為開府從事中

郎帶長安令儉弟素武定末中散大夫

趙令安孟蘭強皆天水白石縣人四世同居行著州

直隸秦州新志 卷之十 人物上 七

里詔並表其門按魏書地理志天水郡南天水郡皆無白石縣而此傳文云文梁州上言

天水白石縣人趙令安孟蘭疆等云云疑非秦州也姑存之以俟考又舊志元魏有李寶李冲父子諸人

考寶傳云隴西狄道人寶既是高之孫不言成紀者何也冲傳亦止云隴西人西漢隴西天水應近東漢

移之襄武遠矣今自魏以後諸李凡言天水隴西或隴西成紀者錄之單言隴西者不錄是或一道與天

水亦是今成縣然舊屬秦州今地亦多入秦州故不可遺也

北齊

李璵字道璠隴西成紀人溫雅有識量為司徒右長

史以明幹見稱累遷驃騎大將軍東徐州刺史解州

還遂稱老疾不求仕弟瑾字道瑜名在魏書才識之



美見稱當代瑾六子彥之倩之壽之禮之行之凝之  
並有器望行之與兄弟深相友愛又風素夷簡爲士  
友所稱璵從弟曉字仁略魏太尉虔子學涉有思理  
釋褐員外侍郎遷鄴後寓居清河託從母兄崔悛宅  
悛給以良田三十頃曉遂築室安居訓勗子姪無復  
宦情武定末以世道方泰乃入郡從仕除頓邱守魏  
書璵曾祖寶傳云隴西狄道人其下又云私署涼王  
嵩之孫然則狄道當作成紀而自寶以下子孫數十  
皆應入志與然唐書宰相表又以  
寶爲姑臧大房去成紀益遠矣

周

直隸秦州新志

卷之十 人物上

三

李賢字賢和隴西成紀人幼有志節不妄舉動九歲  
從師受業略觀大旨而已不尋章句或謂其不精賢  
曰夫人各有志賢豈能疆學待問領徒受業耶唯當  
粗聞教義補已不足至如忠孝之道實銘之於心問  
者慙服年十四遭父喪撫訓諸弟友愛甚篤魏永安  
中爾朱天光討万俟道洛於原州賢以計給道洛使  
出奔率鄉人出馬千匹以助軍天光以爲原州主簿  
遷高平令宇文泰討侯莫陳悅賢爲前驅有功授左  
都督鎮原州大統四年授原州刺史賢雖少從戎旅



而頗閑政事撫導鄉里甚得民和太祖之奉魏太子西巡也至原州遂幸賢第讓齒而坐行鄉飲酒禮焉其後太祖又至原州幸賢第歡宴終日賜與甚厚及高祖西巡幸賢第下詔褒美四年授河州總管賢乃大營屯田以省運漕多設斥候以備寇戎於是羌渾歛迹不敢向東天和四年卒謚曰桓子端嗣端字永貴從高祖平齊於鄴城戰沒贈上大將軍追封襄陽公謚果端弟吉儀同三司吉弟崇位至太府中大夫上柱國廣宗郡公崇弟孝軌開府儀同大將軍升遷

直隸秦州新志

卷之十 人物上

无

縣伯孝軌弟詢少歷顯位大象末上柱國隴西郡公賢弟遠字萬歲幼有器局志度恢然嘗與羣兒爲戰鬪之戲指麾部分便有軍陣之法郡守見而異之及長涉獵書傳略知指趣而已魏正光末天下鼎沸勅勒賊胡宗侵逼原州遠兄弟匿免定策東行崎嶇寇境得達京師魏朝嘉之授武騎常侍遷守高平太祖見遠與語悅之令居麾下魏文帝時積功授都督原州刺史太祖謂遠曰孤之有卿若身體之有手臂之用豈可暫輟於身本州之榮乃私事耳卿若述職則



孤無所寄懷於是遂令遠兄賢代行州事後除大丞相府司馬軍國機務遠皆參之時河東初復民情未安乃授河東郡守遠敦獎風俗勸課農桑肅遏姦非兼脩守禦之備曾未期月百姓懷之太祖降書勞問尋授都督義州宏農等二十一防諸軍事遠善綏撫有幹略守戰之備無不精銳每厚撫外人使爲間諜敵中動靜必先知之至有事泄被誅戮者亦不以爲悔其得人心如此破東魏將段孝先賜衣馬諸物拜大將軍旋除尙書左僕射時太祖嫡嗣未建明帝居直隸秦州新志

卷之十 人物上

三

長已有成德孝閔處嫡年尙幼冲乃召羣公謂之曰孤欲立子以嫡恐大司馬有疑大司馬卽獨孤信明帝敬后父也衆皆默未有言者遠曰夫立子以嫡不以長禮經明義略陽公爲世子公何所疑若以信爲嫌請卽斬信便拔刀而起太祖亦起曰何事至此信又自陳說遠乃止於是羣公竝從遠議出外拜謝信曰臨大事不得不爾信亦謝遠曰今日賴公決此大議孝閔初進位在國以子植謀晉公護事泄護誅植併逼遠自裁建德元年護誅詔贈遠官謚曰忠次子



基字仲和幼有聲譽美容儀善談論涉獵羣書尤工  
騎射太祖召見竒之乃令尚義歸公主後以父勲封  
建安縣公累遷至大都督進爵清河郡公武城二年  
除江州刺史保定元年以憂卒宣正元年追贈官謚  
曰孝子威嗣威起家上士歷遷至柱國

舊志有李弼兄弟周書云

遼東襄平人

權景宣字暉遠天水顯親人父曇騰魏隴西郡守贈  
秦州刺史景宣少聰悟有氣俠宗黨皆歎異之太祖  
平隴右擢爲行臺郎中加平西將軍秦州大中正大  
直隸秦州新志

卷之十

人物上

三

統初轉祠部郎中景宣曉兵權有智略從太祖拔宏  
農破沙苑皆先登陷陣太祖以景宣守張白塢節度  
東南義軍東魏將王元凱入洛景宣與延孫等擊走  
之徵入朝封顯親縣男除南陽郡守郡鄰敵境舊制  
發民守防三十五處多廢農桑而姦宄猶作景宣至  
竝除之唯脩起城樓多備器械盜斂迹民得肄業百  
姓稱之立碑頌德太祖特賞粟帛以旌其能後遷豫  
州刺史鎮荊州威行南服累有戰功累遷官天和初  
授荊州總管十七州諸軍事進爵千金郡公卒謚曰



恭子如璋嗣位至開府膠州刺史如璋弟如玖儀同

大將軍廣川縣侯

舊志有楊薦傳云秦郡寧夷人考魏書有平秦郡所屬無寧夷縣寧

夷自屬咸陽郡豈西魏或周時改屬與然總非秦州也闕之

趙文表其先天水西人後徙南鄭世爲二千石父江

性方嚴有度量歷官開府封伯文表少而修謹志存

忠節能左右馳射好讀左氏春秋略舉大義起家爲

太祖親信保定中積功車騎大將軍儀同三司仍從

宇文貴使突厥迎皇后進止儀注皆令文表典之文

表斟酌而行皆合禮度以功別封伯陽縣伯遷蓬州

直隸秦州新志

卷之十

人物上

三

刺史政尚仁恕夷獠懷之後進位大將軍爵爲公子

仁海襲

舊志從一統志有趙昶趙善史云天水南安人今以昶入名宦

權襲慶天水人也父超魏秦州刺史襲慶周開府從

柱國楊忠與齊師戰於并州被圍百餘里襲慶力戰

殺傷甚衆刀稍皆折遂被害

隋

李穆字顯慶周大將軍遠之弟也少明敏有度量周

太祖委以腹心擒竇泰復宏農並有戰功河橋之戰

太祖所乘馬中流矢驚逸太祖墜於地穆以馬授太



祖遂得俱免累遷大官特賜鐵券恕以十死建德六年除并州總管時東夏再平人情尙擾穆鎮之以靜百姓懷之及隋高祖受禪下詔褒穆穆來朝高祖降坐禮之拜太師贊拜不名子孫在襁褓悉拜儀同一門象笏百餘表乞骸骨詔不許復上表請遷都許之年七十七卒謚曰明長子惇仕周至刺史先穆卒惇子筠以嫡孫襲數年爲其叔父渾賊殺之穆諸子惟雅頗佳少有識量周保定中累以軍功拜大都督隋開皇初進爵爲公餘皆至大官而無聞惟第十子渾直隸秦州新志

卷之十 人物上

三

知名渾字金才偉姿貌美鬚髯仁壽元年從左僕射楊素爲行軍總管破突厥阿勿俟斤於納遠川進位大將軍旣賊筠因以計得嗣穆爵後爲人所陷宗族誅徙穆子孫微矣而穆兄賢子詢崇最顯

詢字孝詢深沉有大略頗涉書記仕周以幹濟聞建德三年武帝幸雲陽宮拜司衛上士委以畱府事周衛王直作亂焚肅章門詢於內益火故賊不得入帝聞而喜之後累以軍功加位大將軍封隴西郡公開皇元年引杜陽水灌三趾原詢督其役民賴其利卒



謚曰襄有子元方嗣

崇字永隆英果有籌筭膽力過人周元年以父賢勲封迴樂縣侯時年尚小拜爵之日親族相賀崇獨泣下賢怪而問之對曰無勲於國而勿少封侯當報主恩不得終於孝養是以悲耳賢由此大奇之尉遲迥之起兵也遣使招之崇初欲相應後知叔父穆以并州附高祖其兄恂時爲元帥長史每諷諭之崇由是亦歸心焉開皇三年除幽州總管突厥犯塞崇輒破之其後突厥大爲寇掠崇率步騎二千拒之轉戰十

直隸秦州新志

卷之十 人物上

三

餘日師人多死遂保於砮城突厥圍之城本荒廢不可守禦曉夕力戰又無所食崇知必不免令其士卒曰崇喪師徒罪當死今日効命以謝國家乃挺刃突厥賊亂射之卒於陣年四十八贈豫郎中永澹毫六州諸軍事豫州刺史謚曰壯子敏字樹生高祖以其父死王事養官中者久之及長襲爵廣宗公起家左千牛美姿儀善騎射尙樂平公主女授柱國煬帝時楊元感反後城大興敏之策也

趙暉字賢通天水西人也祖超宗魏河東太守父仲



懿尙書左丞吳少孤養母至孝年十四有人伐其父墓中樹者吳對之號慟因執送官見魏右僕射周惠達長揖不拜自述孤苦涕泗交集惠達爲之隕涕歎息者久之及長深沉有器局略涉書史周太祖引爲相府參軍事與齊人前後五戰虜獲甚衆吳明徹屢爲寇患吳勒兵禦之前後十六戰每挫其鋒以功授開府儀同三司吳與宗伯斛斯徵素不協徵後出爲齊州刺史坐事下獄自知罪重遂踰獄而走帝大怒購之甚急吳上密奏曰徵自以負罪深重懼死道逃若不北竄匈奴則南投吳越徵雖愚陋久歷清顯奔彼敵國無益聖朝今者炎旱爲災可因茲大赦帝從之徵賴而獲免吳卒不言隋踐阼以吳曉習故事徵拜尙書右僕射出爲冀州刺史甚有威德吳常有疾百姓奔馳爭爲祈禱其得民情如此冀州俗薄市井多姦詐吳爲銅斗鐵尺置之於肆百姓便之上聞而嘉焉願告天下以爲法嘗有人盜吳田中蒿者爲吏所執吳曰此乃刺史不能宣風化彼何罪也慰諭而遣之令人載蒿一車以賜盜者盜者愧慙過於重刑



其以儉化民皆此類也卒後子義臣嗣官至太子洗馬

趙芬字士茂天水西人也父演周秦州刺史芬少有辯智頗涉經史周太祖引爲相府鎧曹參軍芬性強濟後歷諸職皆有聲績又明習故事武帝初拜內史每朝廷有所擬議衆不能決者芬輒爲評斷莫不稱善隋開皇初拜尙書左僕射與郢國公修律令俄以老病出爲蒲州刺史賜錢百萬粟五千石而遣之後以乞骸還賜車馬几杖被褥卒子元恪嗣與弟元楷直隸秦州新志

卷之十 人物上 三

皆明幹世事

李充隴西成紀人也少慷慨有英略開皇中頻以行軍總管擊突厥有功拜朔州總管甚有威名爲虜所憚後有人譖其謀反徵還京師上譴怒之充性素剛遂憂憤而卒陳永貴隴西胡人也本姓白氏以勇烈知名高祖甚親愛之數以行軍總管鎮邊每戰必單騎陷陣官至柱國

王仁恭字元實天水上邽人也祖建周鳳州刺史父猛鄯州刺史仁恭少剛毅修謹工騎射弱冠州補主



簿秦孝王引爲記室轉長道令遷車騎將軍以功進位大將軍歷數州刺史尋改爲汲郡太守有能名徵入朝帝呼上殿勞勉之遷信都太守汲郡吏民扣馬號哭於道數日不得出境其得人情如此後坐事免官尋而突厥屢爲寇患帝以仁恭宿將頗有戰功詔復本官領馬邑太守其後突厥復入定襄仁恭率兵掩擊大獲六畜而歸

權武字武擗周開府襲慶子也以忠臣子起家拜開府襲爵齊郡公武少果勁勇力絕人能重甲上馬嘗

直隸秦州新志

卷之十 人物上

七

倒投於井未及泉復躍而出其拳捷如此後累功增封邑進位大將軍檢校潭州總管武常以南越邊遠治從其俗務適便宜不依律令而每言當今法急官不可爲上令有司案其事皆驗命斬之武於獄申上書言其父爲武元皇帝戰死於馬前以此求哀由是除名爲民仁壽中復拜大將軍封邑如舊

董純字德厚隴西成紀人祖和魏太子左衛率父昇周柱國純少有膂力便弓馬在周累以功歷官儀同爵縣侯高祖受禪進爵爲郡公齊王暕之得罪也純



坐與交通帝庭譴之曰汝階緣宿衛以至大官何乃附傍吾兒欲相離間也純曰臣本微賤下才過蒙獎擢先帝察臣小心寵踰涯分陛下重加收採位至將軍欲竭餘年報國恩耳比數詣齊王者徒以先帝先后往在仁壽宮置元德太子及齊王於膝上謂臣曰汝好看此二兒勿忘吾言也臣奉詔之後每於休暇出入未嘗不詣王所臣誠不敢忘先帝之言於時陛下亦侍先帝之側帝改容曰誠有斯旨於是捨之及帝重征遼東復以純爲彭城畱守時百姓思亂盜賊直隸秦州新志

卷之十 人物上

三

日益純雖頻戰克捷所在蜂起有人譖純怯懦不能平賊帝大怒有司遂希旨致純死罪

辛大德天水人大業中爲信都令誅剪羣盜甚得民和會著作郎虞綽得罪亡命抵大德大德舍之歲餘綽爲人所識告之吏執往江都斬之時併執大德大德妻泣曰每諫君無匿學士今日之事豈不哀哉大德笑曰我本圖脫長者反爲人告之吾罪也當死以謝綽會有詔死罪得以擊賊自効信安吏民詣使者叩頭曰辛君人命所懸辛君若去亦無信安矣使者



留之以討賊帝怒斬使者大德獲全

李景字道興天水休官人也父超周應戎二州刺史  
景容貌竒偉膂力過人美鬚髯驍勇善射平齊之役  
頗有力馬開皇九年以行軍總管從王世積伐陳陷  
陣有功進位上開府高祖竒其壯武使袒而觀之曰  
卿相表當位極人臣景智略非所長而忠直爲時所  
許帝甚信之擊叛蠻向思多破之明年擊吐谷渾於  
青海破之進位光祿大夫五年車駕西巡至天水景  
獻食於帝帝曰卿主人也賜坐楊元感之反也朝臣

直隸秦州新志

卷之十 人物上

三九

子弟多預焉而景獨無關涉帝曰公誠直天然我之  
梁棟也賜以美女帝每呼李大將軍而不名其見重  
如此十二年帝令景營遼東戰具於北平賜御馬一  
匹名獅子駘時盜賊蜂起道路隔絕景遂召募以備  
不虞武賁郎將羅藝與景有隙遂誣景將反帝遣其  
子慰諭之曰縱人言公闕天關據京都吾無疑也後  
爲高開道所圍遇救得出在道遇賊見害契丹靺鞨  
素感其恩聞之莫不流涕有世子謨

隋辛彥之傳稱  
天水牛羸而宏

本傳云安  
定鶉觚人



唐

趙慈景隴西人先尚高祖長廣公至高祖起兵或勸

亡去對曰母以我為命且安往吏捕繫於獄京師平

引拜開化郡公為相國府文學進兵部侍郎為華州

刺史討堯君素戰死贈秦州刺史謚曰忠

諸李單言隴西者不

錄趙則天水望又觀所贈官疑是秦州人也錄之舊

志有趙翺長安人徙居天水母沒廬墓刺血寫佛書

及父沒益毀瘠後翺死子光遠毀瘠如其父

詔表門墓一統志亦載入流寓而唐書無之

姜寶誼秦州上邽人父遠仕周為秦州刺史朝邑縣

公寶誼游太學受書業不進去為左翊衛以積勞爵

直隸秦州新志

卷之十 人物上 四

累永安縣公歷右武衛大將軍與裴寂拒宋金剛戰

汾州兵合寂奔軍走寶誼為所禽帝聞為泣下曰彼

烈士必不下賊死矣賜其家物千段米三百斛果謀

還被害且死西向大呼曰臣無狀負陛下賊平詔迎

其柩贈左衛大將軍幽州總管謚曰剛子恊字壽善

篆籀歷燕然都護夏州都督封成紀縣侯謚曰威

姜謩秦州上邽人隋大業末為晉陽長高祖在太原

暮前識之謂所親曰隋政亂亡必有聖人受之唐公

負王霸資度其必撥亂得天下乃深自結從平霍邑



絳郡進平長安除相國冑曹參軍長道縣公薛舉寇秦州以募山西豪望詔安撫隴外委以便宜仁果平擢秦州刺史帝曰昔人稱衣錦故鄉今以本州相授所以償功涼州荒梗宜有以靖之暮至撫邊俗以恩信盜賊衰止人喜曰不意復見大平官府改守隴州以老去職貞觀元年卒贈岷州都督謚曰安子確

確字行本以字顯貞觀中爲將作少匠護作九成洛陽宮及諸苑籞以幹力稱高昌之役爲行軍副總管出伊州距柳谷百里依山造攻械增損舊法械益精直隸秦州新志

卷之十

人物上

四

遂與侯君集進平高昌戰有功璽書慰勞還爲金城郡公帝將征高麗行本諫不從至蓋牟城中流矢卒帝賦詩悼之贈左衛大將軍郕國公謚曰襄陪葬昭陵子簡嗣行本性格敏所居官雖祁寒烈暑無懈容加有巧思凡朝之營繕所司必諮而後行子柔遠美姿容敷奏詳辯武后時至左鷹揚衛將軍通事舍人內供奉子皎晦

皎長安中爲尙衣奉御元宗在藩邸皎識其有非常度委心焉及卽位授殿中少監出入臥內陪燕私賞



賜不勝計帝在殿庭翫一嘉樹皎盛贊之帝遽令徙植其家後將誅竇懷貞等皎與密議以功進殿中監楚國公議者譏短皎任遇太過帝以其藩邸舊恩乃下詔宣布之遷太常卿監修國史開元五年下詔放歸田里使自娛久之復爲秘書監十年坐洩禁中語爲嗣濮王嶠所劾詔免誅死杖之流欽州子慶初尚新平公主生子寧爲帝外孫早貴幸能傳宮中聲調亂後老病士載酒來則出伎搏髀笑戲觀者尙識承平王孫故態也

直隸秦州新志

卷之十

人物上

聖

晦起家蒲州參軍累爲高陵令治有聲遷長安令人畏愛之開元初擢御史中丞先是永徽顯慶時御史不拜宰相銜命使四方者廷中揖見後稍屈下至晦獨徇舊體謂御史曰不如故事且奏遣公等由是臺儀復振轉太常少卿時國馬乏晦請以詔書市馬六胡州率得馬三十署游擊將軍詔可閑廐乃稍備除吏部侍郎主選曹吏嘗請託爲姦前領選者周棘扈藩檢室內外猶不禁至晦悉除之示無防限然處事精明私相屬諉罪輒得皆以爲神始晦革舊示簡廷



議恐必敗既而賊賊路塞而流品有叙衆乃伏

尹思貞字季弱天水人明春秋擢高第以親喪哀毀除喪不仕左右史張說尹元凱薦爲國子大成每釋奠講辨三教聽者皆得所未聞遷四門助教撰諸經義樞續史記皆未就卒子愔領集賢史館圖書贈左散騎常侍

吳郁兩當人肅宗時爲侍御史以直言被謫

權臯字士繇秦州略陽人晉安邱公翼十二世孫祖文誕上庸太守有聲烈父倕與席豫蘇源明以藝文直隸秦州新志

卷之十

人物上

聖

相友終羽林軍參軍臯擢進士第爲臨清尉安祿山籍其名表爲薊尉署幕府臯度祿山且叛欲行慮禍及親天寶十四載使獻俘京師還過福昌尉仲暮暮妻臯妹也密約以疾召之暮來臯陽暗直視暮而瞑暮爲盡哀自含歛之臯逸去人無知者吏以詔書還臯母母謂實死慟哭感行路故祿山不之虞歸其母臯潛侯於淇門奉侍晝夜南奔客臨淮爲驛亭保以詞北方旣渡江而祿山反天下聞其名爭取以爲屬高適表試大理評事淮南採訪判官永王舉兵脅士



大夫臯詭姓名以免元宗在蜀聞之拜監察御史會  
母喪得風痺疾客洪州南北梗否踰年召命不至有  
中人過州頗求取無厭南昌令王邁欲按之謀於臯  
臯良久不答泣曰今何由致天子使而遽欲治之掩  
面去邁悟厚謝浙西節度使顏真卿表爲行軍司馬  
召拜起居舍人固辭李季卿爲江淮黜陟使列其高  
行以著作郎召不就自中原亂士人率度江李華柳  
識韓洄王定皆仰臯節與友善洄定常評臯可爲宰  
輔師保華亦以爲分天下善惡一人而已卒年四十  
直隸秦州新志

卷之十

人物上

四

六洄等制服行哭詔贈秘書少監元和中謚爲貞孝  
子德輿

德輿字載之七歲居父喪哭踊如成人未冠以文章  
稱諸儒問德宗聞其材召爲太常博士改左補闕貞  
元八年關東淮南浙西大水德輿建言宜擇郡臣明  
識通方者持節勞徠問人所疾苦蠲其租人帝乃遣  
奚陟等四人循行慰撫裴延齡以巧倖進判度支德  
輿疏斥其欺罔不省遷起居舍人歲中兼知制誥進  
中書舍人獨直兩省久之知禮部貢舉真拜侍郎凡



三歲甄品詳諦所得士相繼爲公卿宰相取明經初  
不得員十九年大旱因陳時政數端帝頗採用之已  
而拜禮部尚書同中書門下平章事累有執諍帝皆  
聽納帝嘗問政之寬猛孰先對曰唐家承隋苛虐以  
仁厚爲先太宗皇帝見明堂圖始禁鞭背列聖所循  
皆尙德教帝曰誠如公言德與善辨論開陳古今本  
末以覺悟人主爲輔相寬和不爲察察名後爲山南  
西道節度卒贈尚書左僕射謚曰文德與生三歲知  
辨四聲四歲能賦詩積思經術無不貫綜自始學至

直隸秦州新志

卷之十

人物上

五

老未曾一日去書不觀嘗著論辨漢所以亡大指有  
補於世其文雅正贍縟當時公卿侯王功德卓異者  
皆所銘紀十常七八雖動止無外飾其醜藉風流自  
然可慕貞元元和間爲縉紳羽儀云

子璩字大奎元和初擢進士歷監察御史有美稱以  
薦爲中書舍人時李訓挾寵以周易博士在翰林璩  
與舍人高元裕給事中鄭肅韓偓等連章劾訓傾覆  
陰巧且亂國不宜出入禁中不聽訓誅時人多璩明  
禍福大體能世其家



趙昌字洪祚天水人始為昭義節度府屬累遷虔州  
刺史拜安南都護夷落嚮化後以兵部郎中裴泰代  
之入為國子祭酒未幾州將逐泰德宗召昌問狀時  
年踰七十占對精明帝奇之復拜安南都護詔書至  
人相賀叛兵即走遷嶺南節度使降輯陬荒以勞徙  
節荆南召入再遷工部尚書出為華州刺史對麟德  
殿趨拜強駛帝訪其所以頤養遷太子少保卒年八  
十五贈揚州大都督謚曰成

舊志諸李宗室有元嘉元  
元軌外則有延壽中敏

康伯白與揆益與賀九人耳按李氏源遠流漫即據  
唐書世系所載仲翔始家狄道尚始家成紀尚即漢

直隸秦州新志

卷之十

人物上

吳

將軍廣之父則廣傳高傳及高祖本紀皆謂隴西成  
紀者是也然魏書載高孫寶曰狄道人豈又上本仲  
翔為言耶唐書若李揆之屬皆曰隴西人豈隴西即  
成紀與然有唐一代曷可勝志宗室若涵簡道彥之  
孝行義綦道宗嗣唐王臯之戰功元名與哉之高尚  
宏與賢丕之夙慧憲與倓之讓國讓功漢之文思訓  
之崑適之夷簡峴與勉石與同之為相外則載入隴  
西元道讓夷之屬可傳者多豈獨太白諸人已耶今  
標舉大凡傳皆從略外有辛秘隴西人由來幸氏多  
係狄道今亦不載又權氏三人考史未得而語似有  
據謹注於後權達略陽人崇本曾孫也世以文采政  
事為二千石法達有士行吏才歷成陽縣丞循理蹈  
和權隼字鷲天水略陽人天寶末州里舉經明中正  
後守河南尉官至華州司士所至必聞其政而又學  
古不怠權允字幼明天水人苻秦安邱公翼裔孫童  
子時舅氏崔凝奇其文以為無忌之侶其鄉舉也考  
功郎中蘇頲拔諸郡倅拜監察御史  
允著作甚富動為學者法時輩榮之



五代

王仁裕字德輦天水人也少不知書以狗馬彈射爲樂年二十五始就學而爲人儁秀以文辭知名秦州辟爲秦州節度判官秦州人於蜀仁裕因事蜀爲翰林學士唐莊宗平蜀仁裕事唐復爲秦州節度判官廢帝舉兵得仁裕寘之軍中其馳檄諸鎮詔書告命皆仁裕爲之充翰林學士晉高祖入立罷爲諫議大夫漢高祖時累遷戶部尙書顯德三年卒年七十七贈太子少師仁裕性曉音律晉高祖初定雅樂宴羣直隸秦州新志

卷之十

人物上

四

臣於永福殿奏黃鐘仁裕聞之曰音不純肅而無和聲當有爭者起於禁中已而兩軍校鬪昇龍門外聲聞於內人以爲神喜爲詩其少也嘗夢剖其腸胃以西江水滌之顧見江中沙石皆爲篆籀之文由是文思益進其平生所作詩號西江集仁裕與和凝於五代時皆以文章知名又嘗知貢舉仁裕門生王溥凝門生范質皆至宰相時稱其得人

唐景思秦州人也幼善角觝以屠狗爲生後去爲軍卒累遷指揮使漢高祖時爲泆淮巡檢漢法酷而史



宏肇用事喜以告訐殺人景思有奴言景思與李景  
交通而私畜兵甲宏肇遣吏收景思奴謂吏曰景思  
勇者得則殺之不然將失之也吏至景思迎前以兩  
手抱吏呼冤曰我家在此請索之有錢十千爲受外  
賂有甲一屬爲私畜兵吏索之惟一衣笥軍籍糧簿  
而已吏閱而寬之景思請械送京師以自明景思有  
僕王知權在京師聞景思被告乃見宏肇願先下獄  
明景思不反宏肇憐之送知權獄中日勞以酒食景  
思旣械就道穎毫之人隨至京師共明之宏肇乃鞫  
直隸秦州新志

卷之十 人物上

吳

其奴具伏卽奏斬奴而釋景思周師伐淮南以功遷  
濠州行刺史兵攻濠州以戰傷重卒贈武清軍節度  
使

趙延義字子英秦州人也曾祖省躬通數術避亂于  
蜀父溫珪事蜀王建爲司天監每爲建占吉凶小不  
中輒加詰責戒子孫曰數術吾世業然吾仕亂國得  
罪者數矣子孫能以佗道進不必爲也然延義少亦  
以此仕蜀爲司天監蜀亡仕唐爲星官延義兼通三  
式頗善相人周太祖入京師召延義問漢祚短促者



天數邪延義言王者撫天下當以仁恩德澤漢法深酷刑罰在濫天下稱冤此其所以亡也是時太祖方以兵圍蘇逢吉劉銖第欲誅其族聞延義言悚然因貸其族二家獲全延義事周爲太府卿判司天監以疾卒

宋

尹崇珂秦州天水人父延勛歷三州刺史崇珂初事周世宗於藩邸以謹厚稱從戰高平有功連進官宋初出爲淄州刺史有善政民詣闕請刻石頌德太祖直隸秦州新志

卷之十 人物上

晁

命殿中侍御史李穆撰文賜之遷保信軍節度未幾南漢開府樂範容州都指揮使鄧存忠韶州賊帥周思瓊春恩道都指揮使麥漢瓊等據五州之地以叛崇軻討平之卒贈侍中弟崇珪歙州刺史子昭吉官至洛苑使昭輯至供奉官閣門祗候

李仕衡字天鈞秦州成紀人進士及第調鄆縣主簿田重進守京兆命仕衡鞠死囚五人活者四人重進卽其家謂曰子有陰施此門當高大之徙知彭山縣寇準薦其材徙知劍州王均反仕衡度州兵不足守



卽棄城焚芻粟輦金帛東守劔門旣而賊攻劔州州  
空無所資卽趨劔門仕衡迎擊之乃乘驛入奏擢尙  
書度支員外郎度支使梁鼎言商人入粟于邊率高  
其直而售以解鹽商利益博國用日耗請調丁夫轉  
粟而輦鹽諸州官自鬻之仕衡曰安邊無大於息民  
今不得已而調歛之又增以轉粟輓鹽之役欲其不  
困何可得哉不聽遂行鬻議而關中大擾乃罷鼎度  
支使以仕衡爲荆湖北路轉運使徙陝西召爲度支  
副使上言關右旣弛鹽禁而永興同華耀四州猶率  
直隸秦州新志

卷之十

人物上

五

賣鹽年額錢請減十之四詔悉除之累遷河北轉運  
使建言河北歲給諸軍帛七十萬而民艱於得錢悉  
預假於里豪出倍償之息以是工機之利愈薄方春  
民不足請戶給錢令夏輸帛則民獲利而官用足矣  
詔優其直乃推其法於天下以爲河北都轉運使棣  
州汚下苦水患仕衡奏徙州西北七十里旣而大水  
沒故城丈餘明年旱蝗發積粟賑民遷尙書工部侍  
郎權知天雄軍民有盜瓜傷主者法當死仕衡以歲  
饑奏貸之盜起淄青間遷刑部侍郎知青州前守捕



羣盜妻子寘棘園中仕衡至悉縱罷之其徒有梟賊  
首至者入爲三司使帝作寬財利論以賜之乃更陝  
西入粟法使民得受錢與茶舊市羊及木責吏送京  
師而羊多道死水至湍險處往往漂失吏至破產不  
能償仕衡乃許吏私附羊免其筭使得補死者聽民  
自採木輸官用入粟法償其直拜尚書左丞改同州  
觀察使知陳州州大水築大堤以障水患後坐其婚  
有罪分司西京卒子丕緒蔭補將作監主簿累官至  
司農卿致仕丕緒居官廉靜不爲矯激家多圖書集  
直隸秦州新志

卷之十

人物上

至

歷代石刻爲數百卷藏之

劉仲武字子文秦州成紀人熙寧中試射殿庭異等  
補官數從軍累轉爲涇原將夏人犯天聖砦力戰却  
之遷皇城使知河州吐蕃趙懷德狼阿章衆數萬叛  
命仲武相持數日潛遣二將領千騎扣其營戒曰彼  
出勿與戰亟還伏兵道左二將還羌果追之遇伏大  
敗斬首三千級復西寧州未幾懷德阿章降累進榮  
州防禦使副高永年西征仲武欲持重固壘永年易  
賊輕戰遂大敗仲武與夏人戰傷足朝廷問之貸其



謂以爲西寧都護童貫招誘羗王子臧征僕哥邀仲武計事仲武曰王師入羗必降或退伏巢穴可乘其便但河橋功力大非倉卒可成緩急要預辦耳若稟命待報慮失事機貫許以便宜僕哥果約降而索一子爲質仲武卽遣子錫往河橋亦成仲武師師渡河挈與歸貫掩其功仲武亦不自言徽宗遣使持璣至邊賜獲王者訪得仲武召對帝勞之曰高永年以不用卿言失律僕哥之降河南綏定卿力也問幾子曰九人悉命以官賜閣門祇候仲武後九遷至節度使直隸秦州新志

卷之十 人物上

至

請老再起卒於官年七十三贈檢校少保謚曰威肅趙隆字子漸秦州成紀人以勇敢應募從王韶取熙河大將姚麟出戰被重創謂曰吾渴欲死得水尙可活時已暮有泉近賊營隆獨身潛往漬衣泉中賊覺隆且鬪且行得歸持衣裂水以飲麟乃甦又從李憲破西市師討鬼章外河諸羗皆以兵應之際李衆先至斧其橋鬼章失援乃成擒爲涇原將戰平定川功最多夏人寇涇原師至鐵山隆先登士皆殊死戰夏人解去名詣闕徽宗慰勞之曰鐵山之戰卿力也



童貫與論燕雲事隆極言不可貫曰君能共此當有殊拜隆曰隆武夫豈敢干賞以敗祖宗二百年之好異時起釁萬死不足塞責貫知不可奪白以知西寧州充隴右都護羌豪信服卒贈鎮潼軍節度使命詞臣製碑帝篆額曰旌思

劉愿天水人天資耿介時王安石新說盛行學者靡然向風愿獨謂其穿鑿潛心伊洛之學後以八行舉程俊河池人幼時父母陷於西夏稍長捐家資往贖之未得日夜泣請夏人爲感動遂歸之詔旌其門仕直隸秦州新志

卷之十

人物上

三

至康州防禦使

縣志云紹興中尚書劉子

劉錡字信叔仲武第九子也美儀狀善射聲如洪鐘嘗從仲武征討牙門水斛滿以箭射之拔箭水注隨以一矢室之人服其精高宗初爲隴右都護與夏人戰屢勝夏人兒啼輒怖之曰劉都護來張浚宣撫陝西一見奇其才以爲涇原經略使紹興六年權提舉宿衛親軍帝駐平江解潛王奇兩軍交關俱罷命錡兼將之錡因請以前護副軍及馬軍通爲前後左右中軍與游奕凡六軍每軍千人爲十二將前護副軍



卽諺八字軍也於是錡始能成軍十年金人歸三京  
充東京副留守所部八字軍纔三萬七千人益殿司  
三千人皆攜其孥將駐于汴家畱順昌錡自臨安泝  
江絕淮至渦口方食暴風拔坐帳錡曰此賊兆也至  
暴兵卽下令兼程而進未至順昌三百里舍舟陸行  
先趨城中諜報金人入東京知府事陳規見錡問計  
錡曰城中有糧則能與君共守規曰有米數萬斛錡  
曰可矣召諸將計事皆曰金兵不可敵也請還江南  
錡曰吾本赴官畱司今東京雖失幸全軍至此有城

直隸秦州新志

卷之十 人物上

五

可守奈何棄之敢言去者朝鑿舟沉之寘家寺中積  
薪於門戒守者曰脫有不利卽焚吾家於是軍士皆  
奮錡於城上躬自督厲取偽齊所造癡車以輪轆埋  
城上又撤民戶扉周匝蔽之城外有民居數千家悉  
焚之凡六日粗畢而游騎已涉潁河至城下圍順昌  
旣而三路都統以兵三萬薄城錡令開諸門金人疑  
不敢近初錡傅城築羊馬垣穴垣爲門至是蔽垣爲  
陣金人縱矢皆自垣端軼著于城或止中垣上錡用  
破敵弓翼以神臂強弩自城上或垣門射敵無不中



敵稍却復以步兵邀擊渴河死者不可勝計圍四日  
金兵益盛乃移砦於東村距城二十里錡募壯士五  
百人夜斫其營是夕天欲雨電光四起錡復募百人  
以往命折竹爲踦如市井兒以爲戲者人持一以爲  
號電所燭則皆奮擊電止則匿不動聞吹聲卽聚金  
人不能測終夜自戰積屍盈野退軍老婆灣兀术在  
汴聞之不七日至順昌錡聞兀术至募得言成等二  
人諭之曰遣汝作間置汝緯路騎中汝遇敵則佯墜  
馬爲敵所得敵帥問我如何人則曰太平邊帥子喜

直隸秦州新志

卷之十 人物上

五

聲伎朝廷以兩國講好使守東京圖逸樂耳已而二  
人果遇敵被執兀术問之對如前兀术喜曰此城易  
破耳卽置鵝車砲具不用翌日錡登城望見二人遠  
來縋而上之乃敵械成等歸以文書一卷繫于械錡  
懼惑軍心立焚之兀术至城下錡遣耿訓以書約戰  
兀术怒曰劉錡何敢與我戰以吾力破爾城直用靴  
尖擡倒耳訓曰太尉非但請與太子戰且謂太子必  
不致濟河願獻浮橋五所濟而大戰兀术曰諾乃下  
令明日府治會食遲明錡果爲五浮橋於潁河上敵



出之以濟錡遣人毒穎上流及草中戎軍士雖渴死毋得飲於河時天大暑敵遠來人馬饑渴食水草者輒病方晨氣清涼錡按兵不動逮未申間敵力疲氣索忽遣數百人出西門接戰俄以數千人出南門戒令勿喊但以銳斧犯之敵大敗拔營北去錡遣兵追之死者萬數方大戰時兀木被白袍乘甲馬以牙兵三千督戰兵皆重鎧甲號鐵浮圖戴鐵兜牟周匝綴長簷三人爲伍貫以韋索每進一步卽用拒馬擁之人進一步拒馬亦進退不可却官軍以槍標去其兜

直隸秦州新志

卷之十 人物上

五

牟大斧斷其臂碎其首敵又以鐵騎分左右翼號擄子馬所向無前至是亦爲錡軍所殺敵敗遽以拒馬木障之少休城上鼓聲不絕乃出飯羹坐餉戰士如平時敵披靡不敢近食已撤拒馬木深入斫敵又大破之棄屍斃馬血肉枕藉車旗器甲積如山阜時洪皓在燕密奏順昌之捷金人震恐喪魄燕之重寶珍器悉徙而北意欲捐燕以南棄之會秦檜主和兵皆罷十一年金人敗盟攻廬和二州錡自太平渡江抵廬州據東關之險以遏其衝引兵出清溪兩戰皆勝



翌日復戰復勝之敵望見順昌旗幟皆退走三十一年金主亮南侵以錡節制各路軍馬敗敵於皂角林明年錡卒贈開府謚武穆錡慷慨深毅有儒將風金主亮之南也枚舉南朝諸將問其下孰敢當者皆隨姓名答如響至錡莫有應者

張俊字伯英成紀人好騎射負才氣年十六爲三陽弓箭手從討南蠻攻夏人平鄆州河朔賊金人攻太原命制置使种師中往援屯榆次俊時爲隊將進擊殺傷甚衆請乘勝要戰師中以日不利急令退保金

直隸秦州新志

卷之十 人物上

七

人諜俊計不行悉兵合攻圍益急榆次破師中死之俊與所部數百人突圍而出金人圍汴京高宗時爲兵馬大元帥俊勒兵從信德守臣梁楊祖勤王高宗見俊英偉擢元帥府後軍統制從高宗至東平中書舍人張徵自汴京齎蠟詔命高宗以兵付副帥還京高宗問大計俊曰此金人詐謀爾今大王居外此天授豈可徒往因請進兵高宗許之遂如濟州開啟乾龍節迨夜有告高宗欲俟元帥謁香切以叛羣議集諸軍屯備俊曰元帥不出姦謀自破賊窮黎明引軍



北道俊勒兵追殺之汴京破二帝北遷俊首勸進高宗卽位以俊爲御營前軍統制討杜用于淮寧趙萬郭清于鎮江陳通于杭州蔣和尚等于蘭溪皆平之尋破秀州賊數萬縛徐明斬之苗傳劉正彥之亂與諸將平之拜鎮西節度尋爲浙東制置使兀朮攻臨安帝御樓船如溫州詔俊於明州以拒敵會除夕金兵至城下諸將力戰殺之俊益戒將士毋驕情慮敵必再至下令清野多以輕舟伏弩閉關自守正旦西風起金人乘之果復攻明州俊與劉洪道坐城樓上直隸秦州新志

卷之十

人物上

五

遣兵掩擊殺傷大當金人拔砦去未幾江浙羣盜蠶起授俊兩浙西路江南東路制置使羣盜悉平時金人殘亂之餘孔彥舟據武陵張用據襄漢李成尤悍疆據江淮湖湘十餘州連兵數萬久圍江州俊慨然請討遂改江淮路招討使成黨馬進在筠州豫章介江筠之間俊急趨豫章且曰我已得洪州破賊決矣乃歛兵若無人者金鼓不動令將士登城者斬居月餘進以大書牒來索戰俊以細書狀報之賊以俊爲怯俊諜知賊怠乃議戰大敗之復筠州乘勝追至江



州成勢迫絕江而遁號俊爲張鐵山復江州已而興國軍等處羣盜聞俊兵至皆遁去馬進爲追兵所殺成北走降劉豫諸郡悉平拜太尉金人與劉豫分道入侵以俊爲淮西宣撫使薄諸淮大敗之獲其酋程師回張延壽以獻劉麟兵十餘萬犯濠壽俊率大軍與戰殺獲略盡降者萬餘人八年與金和九年金渝盟三路都統自東南兩京分道來侵抵亳州俊收宿亳諸軍擊之盡復衛真鹿邑等地十年復亳州進少師封齊國公十一年敗金人于柘臯拜樞密使會秦

直隸秦州新志

卷之十

人物上

五

檜王和俊首請納兵與檜意合言無不從薦士大夫監司郡守者甚衆雖劉子羽自謫籍起家亦俊力也加太傅進益國公等進封清河郡王奉朝請二十一年帝幸其第拜太師子弟皆遷秩再數年薨追封循王子五人子倚子厚子顏子正子仁

張子蓋字德高俊從子父宏應募從俊軍河上金人破開德府宏戰死子蓋初從韓世忠討苗傅補承信郎從俊擊劉猗于藕塘授閣門宣贊舍人十年以興復宿亳功遷登州防禦使兀朮南侵子蓋從王德入



和從劉錡敗金人柘臯兀朮復攻濠州子益又敗之  
于馬梁橋除興寧軍承宣使十三年帝幸俊第還鎮  
江授少保淮東招撫使卒贈太尉謚恭壯

曹友聞字允叔栗亭人武惠王彬十二世孫也少有  
大志登寶慶初進士授絲竹尉改辟天水軍教授城  
己被圍友聞單騎夜入與守臣張維糾民厲戰兵退  
制置使製大旗書滿身膽以旌之己而兵復至友聞  
罄家財招集忠義得健士五千人制置使李璣檄管  
忠義領所部守山又檄捍七方關敵破關長驅入劍  
直隸秦州新志

卷之十

人物上

李

門友聞與弟萬各率所部取間道戰於白水江中流  
兵退制置司檄駐閬州遂知天水軍北兵略河池抵  
同慶友聞部分諸將各守一門偃旗伏鼓戒士卒俟  
漸近鳴鼓張旗矢石並發又命將取間道出戰自提  
重兵尾敵後大戰有功明年北兵圍制置司於青野  
原友聞遣萬領兵由間道直趨青野原制置使竒萬  
之勇令督諸軍戰友聞引精兵亦趨至夜半截戰圍  
遂得解特授武德大夫左驍騎大將軍北兵破沔州  
擣大安友聞遣摧鋒軍統制王資踏白軍統制白再



興速趨雞冠隘左軍統制王進據陽平關友聞登溪  
嶺手執五方旗指麾甫畢兵數萬突至陽平關遂遣  
進及遊奕部將王剛出戰又親帥帳兵及背嵬軍突  
出陳前左右馳射兵乃解去特授友聞及弟萬皆節  
制同戍軍馬明年扼仙人關諜聞北兵合西夏女真  
回回吐蕃渤海軍五十餘萬大至制置使趙彥呐檄  
友聞控制大安以保蜀口友聞馳書彥呐曰沔陽蜀  
之險要吾重兵在此敵有後顧之憂必不能越沔陽  
而入蜀又有曹萬王宜首尾應援可保必勝大安地

直隸秦州新志

卷之十 人物上

空

勢平曠無險可守正敵騎所長步兵所短况衆寡不  
敵豈可於平地控禦彥呐不以爲然一日持小紅牌  
來速者七友聞議爲以寡擊衆非乘夜出奇內外夾  
擊不可乃遣兵上雞冠隘多張旗幟示敵堅守友聞  
選精銳萬人夜渡江密往流溪設伏親帥精兵二千  
人疾馳至隘下先遣敢死士五百人衝前前軍不動  
會大風雨諸將請曰雨不止淖濘深沒足宜俟少霽  
友聞斥曰敵知我伏兵在此緩必失機遂擁兵齊進  
內外兩軍皆殊死戰血流二十里西軍素以繇裘代



鐵甲經雨濡濕不利步關黎明敵兵益增迺以鐵騎四面圍驍友聞歎曰此殆天乎吾有死而已矣於是極口詬罵血戰愈厲與弟萬俱死事聞特贈龍圖閣學士大中大夫賜廟褒忠謚曰節官其二子承務郎堦進功郎萬特贈武翼大夫一子成忠郎

楊大全天水人宋末守叙州元兵入蜀戰死贈武節

大夫謚曰愍官其長子文仲而弟大淵子文安入元

復有名舊州志有趙遠張詔董凝曹友慶四人徽縣志有崔立王煥二人考遠傳云其先秦人也

八世祖徙蜀之資州無論徙蜀已久卽秦人亦非指定秦州也詔傳云成州人立傳云關封蜀陵人不知

直隸秦州新志 卷之十 人物上 空

志與史誰誤皆從闕疑餘三人考史未得皆注於後董凝天水人家多田未嘗親治稼穡好讀書以教子為樂任京師以錢萬緡買監書以歸後其子經四登能書綬緯同擢第而約繼之曹友慶友聞弟也西城滿子阿釐拒境不庭友慶力戰獲之天子勞以紋綺賜襲父爵拜武德將軍佩虎符從汪參政殄滅滇寇民賴以寧拜宣武將軍施州容美洞麥色釋侵叛友慶出己金幣鈔錠傾誘歸欵詣闕待罪王煥徽州人煥以進士知武當縣建炎間賊犯鈞州煥率邑人保山寨賊至或勸之遁煥曰使吾有此心則不能與邑人為此謀耳遂力戰守之遷京西湖北路制置使授忠訓郎弟焯修職郎知同谷縣主管勸農工事焯從仕郎明一統志又有楊堯兩當人少刻志於學仕為進武副尉



直隸秦州新志卷之十

人物中

金

伯德梅和尚秦州人也性鯁直尚氣節正隆五年收充護衛明昌初積官至西北路副招討改秦州防禦使升武勝軍節度使六年移鎮崇義軍時有事北邊左丞相夾谷清臣行省於臨潢檄爲副統會敵入臨潢梅和尚暨護衛關合王等領軍逆擊之敵積陣以待梅和尚直擣其陣殺傷甚衆敵知孤軍無繼聚兵圍之度不能免乃下馬相背射復殺百餘人矢盡猶以弓搥擊爲流矢所中死詔賜祭葬官其子

直隸秦州新志

卷之十

人物中

張邦憲字正叔秦州人登正大中進士第爲永固令天興二年避兵徐州卓翼率兵至城邦憲被執將驅之比邦憲罵曰我進士也誤蒙朝廷用爲邑長可從汝曹及耶遂遇害

元

楊大淵天水人也與兄大今弟大楫皆仕宋大淵總兵守閬州歲戊午憲宗兵至閬州之大獲城遣宋降



臣王仲入招大淵大淵殺之憲宗怒督諸軍力攻大淵懼遂以城降命以其兵從招降蓬廣安諸郡擢大楫爲管軍總管拜大淵侍郎都行省悉以閩外之寄委之大淵建言謂取吳必先取蜀取蜀必先取夔乃遣其姪文安相夔達要衝城蟠龍山山四面巖阻可以進攻退守復請於利州大安軍以鹽易軍糧於渠江濱築虎嘯城以逼宋大良城不踰時而就中統四年宋賈似道遣人賫空名告身及蠟書金幣誘大淵南歸文安擒之以聞併詔獎大淵前功賜寶鈔卒追直隸秦州新志

卷之十

人物中

二

封閩中郡公謚肅翼子文燾襲爲都元帥兄子文安文安子泰叔太全之死節也宋官其長子文仲時文安方二歲母劉氏鞠之依叔父大淵於閩州大淵降文仲亦授安撫使中統元年授文安監軍戰屢勝至元五年文仲卒詔文安就充閩州夔東路安撫使閩州累遭兵變戶口凋耗文安乃教以耕桑鰥寡不能自存願相配偶者併爲一戶充役民始復業自是連歲遣兵攻掠措置屯田築金陽城以積其糧數年無慮數十戰戰輒勝全蜀皆定文安入覲以所得城邑



繪圖獻帝勞之曰何若是多也進中書左丞行江西  
省事卒子良之襲佩虎符昭勇大將軍管軍萬戶歷  
湖南宣慰副使岳州路總管卒

大淵臣節有虧以  
入人物為姪先也

畢也速答立迷裏氏家秦州父喪廬墓次晝夜悲號

有飛鳥翔集墳土踴起

舊州志及禮縣志有趙國瑤  
趙世延即名宦按竺邇子孫

也按竺邇傳言鎮西漢陽而其子襲鎮文州則漢陽

即文州舊志以禮縣為文州而元人又多世職故省

志亦載世延而云秦州漢陽人則誠是禮縣人矣然

有可疑者省志記世延於秦州而又以文州為文縣

一也元時地理無秦州漢陽之名二也世延傳又云

乃祖鎮蜀遂家成都三也志云國瑤早卒是即按竺

邇傳中所云徹理而史不著其名四也志以世榮為

國瑤子而史以為國寶子五也抵牾多矣姑從闕疑

直隸秦州新志

卷之十

人物中

三

又禮縣志有石名官中書省參知政事石吉連禮店  
軍民元帥封雍國公謚忠穆子石麟  
襲元帥封雍國公謚忠宣皆於史無考而志亦但舉  
官爵羌無故實皆畧之秦州雷氏家譜載其祖震亨  
元初參陝西行省事從太宗伐西蜀取襄樊後復諫  
征高麗考太宗本紀征高麗在取蜀取襄樊之後故  
不敢載又言震亨子衡信至順初兩平洮  
岷蕃族之亂官龍虎上將軍則或有之

明

門克新秦州人以本州訓導秩滿入朝召問經史及

政治得失對稱旨擢贊善以亮直見稱不數年至禮

部尚書尋引疾命太醫給藥物仍予俸及卒親為文

以祭之

舊志載公天嘉人然  
彼時禮縣猶未分也



高斗南字拱極徽州人洪武中由薦舉知四川定遠縣三年以他事被徵下獄其耆民奔走闕下具列善政以聞太祖嘉之賜襲衣寶鈔遣還併賜耆民路費尋舉天下廉吏數人斗南與焉九載擢雲南新興知州民愛之如定遠後引疾薦子吏科給事中恂自代恂字士信博學善詩文習騎射初以薦至京太祖命翰林兵部兩試之文武皆優等授給事彈劾不避權貴既代父官會安南亂成祖遣將討之命恂權行司馬節制諸將師還卒官三軍皆哭子儒字崇文歷兩直隸秦州新志

卷之十

人物中

四

衛經歷廉謹勤事陞山西石州同知佐知州力清逋賦州以大治

胡彥祥徽州人少有大志刻苦力學永樂中以鄉貢爲肅寧令自奉清約取予不苟擢監察御史巡按北直除強扶弱貴戚歛手遷知眉州德威並施重農興學修堰以廣水利陞保寧府遷河間擢山西參政祿俸自給外悉以給公家無私焉

王恕秦安人永樂初歷府軍右衛經歷被選督修皇城成祖幸城見恕老成諭左右曰此可作臺諫者事



竣擢浙江道監察御史巡按廣西復有風力進雲南  
按察司僉事

張翼秦安人永樂間鄉舉授御史巡按江西歲大祲  
殍殮相屬翼繪圖上疏請賑之發帑金數十萬全活  
甚衆又江岸地斥鹵可田翼命開墾給牛種鑿渠道  
灌田萬餘頃民以殷富劾龍臣劉觀貪婪不法帝卽  
遣戍觀又劾中涓陽進怙寵要息爲中官所嫉忌致  
仕歸

胡璉字大用秦安人善文辭能詩屢舉不第景泰間  
直隸秦州新志

卷之十 人物中

五

以國子生授南皮知縣嚴以懲宥平以近民盜不涉  
境蝗不害稼九載考最吏部方欲用之顧屢疏乞休  
吏部嘉其去就特奏許之至南皮攀送者相望於路  
子七人士濟最知名士濟字澤民由國子生仕成都  
縣學訓導以文行導諸生蜀王繫士高文質士濟自  
謁枚王明文質無罪王釋之遷益亭雙流教諭嘗兩  
受臺檄攝縣事慈祥威斷民畏而愛之商蒲銘密寓  
金士濟所銘死召其子而與之金盜竊其贏旣獲盜  
教而釋之



周蕙字廷芳本山丹衛人年二十聽人講大學首章  
奮然感動成蘭州守墩聞容思段公集諸儒講學時  
往聽之有聞卽服行久之諸儒令坐聽旣而與坐講  
旣而以爲畏友有疑與訂論焉段公勗以聖賢可學  
而至示以進修之方遂殫力就學有總兵恭順侯吳  
瑾者聞其賢欲延教其子蕙固辭或問故蕙曰總兵  
以軍士役某敢不往召之教子則不敢往侯親送二  
子於其家始納贄焉後隱居秦州之小泉因以爲號  
人稱小泉先生西安李公錦爲關西名儒與渭南薛  
直隸秦州新志

卷之十

人物中

六

思菴咸師事之州守數造其廬舉鄉飲賓不赴巡按  
杜公以禮見聆其議論不覺前席嘗正冠婚喪祭之  
禮以示學者秦人至今遵之

王爵字錫之秦州人少潛心力學長游周小泉之門  
州守秦紱敬之時與講求操存之學宏治初以國子  
生仕爲保安州判出納不忒人稱平焉及歸時秦已  
陞總制矣贈以鹽引數百石堅辭不受

張銳字抑之秦州人成化初舉於鄉已而登進士授  
刑部主事進員外郎郎中以平恕考最遷江西吉安



知府政教兼舉然臨事剛直往往忤諸權貴三載調漢陽初心益勵首剗奸蠹數人有赫赫聲遷山東參政歸猶進諸弟子於庭講學不倦

陳昂清水人由舉人知內黃縣內黃多世家號難治昂慤直不阿人服焉以才陞去

張錦字尚綱其先太康人高祖敬元參知政事遣戍岷分屯於秦安之隴城錦少游邑學甘貧刻苦讀書龍泉寺經旬不下山成化己丑成進士授刑部主事員外郎郎中以才擢大理寺少卿再遷右副都御史

直隸秦州新志

卷之十

人物中

七

巡撫宣府劾罷中官及武將不職者未幾移撫保定有貴臣爲都御史秦紘所劾駐以數萬牒勢求免錦卒正其罪進刑部右侍郎致仕歸子潛字用昭宏治六年進士累官至山東右參政潛子之桀有孝行初以鄉舉卒業國學夢母病馳歸而母果病禱天願以身代卒不起哀毀踰禮旣葬廬於墓雪夜伏墓而泣曰吾母素畏寒也間入城省父而墓所乃有翔鳥湧泉之異云

夏景和字時雍秦州衛籍登成化二十年進士授行



人擢監察御史持紀剛直人不敢干以私孝宗以其直諫或事有不安輒曰黑秀才知之又上疏矣後遷山西按察司副使逆瑾執政摘以事逮繫詔獄後事白遷都察院右副都御史巡撫宣府

堅晟字伯明秦州人由監生授廣平縣丞以薦遷知博平縣東郡盜侵博平晟城守先閉妻子於宅圍之以棘云吾簪到爾輩可自裁盜攻不得以去遷知薊州改通州薊通之民兩爭之及守通有中貴苑董同知墮河晟以狀聞寘於法明年坐公罪謫雲南某州

直隸秦州新志

卷之十

人物中

八

同知尋復通安知州改守寧州所至有聲

省志秦州人物有蘇

民言是宏治進士而選舉志無有

文獻張鳳王謙皆徽州人獻成化中舉人爲監察御史以正直稱巡按北直雲南河南所至貪吏望風遁河南有賊殺人奪貨悞坐平民獻密訪得賊人稱其神奉命閱盧氏銀帑搜剔宦官監督弊以紓民怨宦官啣之誣之下獄值風雷之變卽日赦出陞山東僉事湖廣副使益有治行焉鳳字廷儀以貢生歷官王府教授輔導不見聽遂乞休歸性豪邁有才成化末



居家上疏論時政十事皆切時弊謙由監生知壽州  
單車赴任將入境移檄杜絕奔競至州勸課農桑懲  
豪橫恤鰥寡發奸摘伏號稱神明九載考績民赴京  
乞留朝廷褒之加參議

胡纘宗字世甫素安人正德戊辰進士殿試對策擬  
一甲有權宰私庇其子抑置三甲一名李東陽憐其  
才請同一甲傳臚卽授翰林院檢討參對孝宗實錄  
成賜金帛爲息者所中外補州判四遷知江南安慶  
府時宸濠變後兵凶相仍武宗又行幸南京纘宗奉  
直隸秦州新志

卷之十

人物中

九

上安民事皆無誤明年移知蘇州蘇州賦甲天下纘  
宗守蘇最久廉潔辦治聲名更勝安慶時陞山東參  
政改浙江再改山西以平盜功賜金幣陞山西右布  
政改河南復平鄆陵盜轉左布政陞都察院右副都  
御史巡撫山東開修萊河以利民魯王恣橫疏糾之  
改總理河道又開考城黃河支流殺歸睢水患再改  
河南巡撫疏請帑金二十萬賑民饑後以行臺被災  
引咎歸纘宗幼失母繼母遇之嚴其姊每夜口銜油  
以俾之學遂博極群書所著詩禮春秋諸經解安慶



蘇州漢中鞏昌秦州秦安志烏鼠山人集選唐雅雍  
音等書約二百卷行於世

侯一元字應乾秦安人宏治間登進士授工部主事  
視閘濟寧舊視閘官有取船貨通饋贖嚴稽察坐科  
罰者一元俱罷之獨鱗坎官民之船不令踰越濟人  
稱便爲立碑後改禮部進吏部驗封司奏革貴戚世  
爵曰非軍功不侯高皇之制也及卒宗伯霍韜爲之  
銘題曰嗚呼秦安侯應乾之墓

張惠字濟民秦安人嘉靖中以貢士廷試名第二授  
直隸秦州新志

卷之十

人物中

十

四川保寧府推官兩攝巴州事風厲有爲改建東南  
二城門創立文昌祠於金榜山重修文廟改建儒學  
興利除弊士民感之立碑碣以誌遠以憂歸遂不欲  
仕娛志林泉以老

李光坤清水人八歲通經書人以神童目之後以明  
經授亳州判官早致仕歸人又高其行

雍恭字南可清水人以拔貢授富川知縣苗蠻荒遠  
瘴癘頻仍前任皆於古城寨泄事恭修復城池鼎新  
翼宮廟宇招集民人爲改革雜役去濫征捐俸建橋



梁置義倉俗多盜賊恭重懲之遠近無犯者聽訟如流尤能剖曖昧事上司每以他屬疑獄委焉

胡來縉字仲章秦州人由舉人爲縣令用才調大興將之官或慮權貴且撓政來縉曰京縣之難在逐情違理惜官執法而已吾循理守法他何知焉任三年清潔勤敏不得毫髮私權貴人反薦譽之陞戶部郎中出內有方吏無所容奸陞山西按察副使子忻

忻字慕之登萬歷己丑進士知山西臨汾縣刑清政簡教化大行官民相習若父子晉工科給事時三殿

直隸秦州新志

卷之十

人物中

十一

大工方興閹商扶同破冒幾百萬忻疏發其奸請身任之遂減十之五其他論陵寢論河工皆中事宜轉禮科請郊祀請日講請立太子凡數十疏直聲震朝廷至以其言撤回稅監梁永除秦州礦稅人尤賴之晉太常少卿署正卿三疏乞親郊廟不報遂累疏引疾歸後累推不起忻初從父在京遊葉相國向高門講求理學故當官不負所志爲清流之望有自來矣卒父子俱崇祀鄉賢祠

李崧字五山秦州人嘉靖壬戌進士歷湖廣按察副



使轉南京織紡司中貴來監視者多需索一切絕之  
爲所中以罪召問崧痛陳所苦上爲動容減筐篚貢  
而遷崧兵科給事中已請疾家居有巡按過秦候之  
入其門見崧織於堂上以爲僕也手招之出曰而公  
安在崧謬曰在寢請入白之趨而入巡按怪其久不  
出也徑入知織者卽崧也坐歎息良久曰公一貧至  
此乎逡巡出懷中金爲壽崧固不受巡按徑置几上  
出崧怒卽劾之巡按得罪去人以是益服崧

郭莊郭從道皆徽人莊字子莊隆慶二年進士以庶

直隸秦州新志

卷之十

人物中

十三

吉士授御史巡按吳中吳貴人子弟多關說一切法  
治之復按蜀蜀府有所請於朝久沈閣莊爲請得允  
王饋以金却之入掌河南道主計吏不敢通饋遺再  
出督學吳中黜浮崇雅士風變焉從道由舉人授大  
名府判陞應州知州轉潞安行取戶部員外郎轉貴  
州兵備僉事進階參議致仕歸值秋霖方食輟著人  
問其故曰向修應城工一處未堅今如此雨恐圯矣  
悵然久之

胡多見字三多秦安人幼時其祖芑官鳳翔教授多



見隨之上官偶屬苑爲文非命多見爲之上官竒其  
文詢知之請禮見焉十四成諸生二十食餼求文者  
踵其門邑少俊皆出門下其後皆有名崇正中以寇  
亂急才特設超貢科多見與選焉授東昌府通判時  
寇陷博平夷其城督撫命多見攝縣事弁賣衣物得  
數百金募修城不三日而就又署冠縣總兵劉澤清  
率衆南下言欲入城養病多見閉門而遺之糧澤清  
怒遂攻城多見出囊金犒士固守澤清引去至懷慶  
兵果變而冠縣獲全多見車出土女擁道泣拜不得  
直隸秦州新志

卷之十 人物中

十三

行功上陞兵部主事會以病請歸踰年閏三月十九  
日之變北望叩首出血日夜哭不已已而疽發於背  
順治三年巡撫薦地方人才首及多見已不可起矣  
子公澤俠爽好施官華陰訓導

馮均臣羅榮劉鑾皆兩當人均臣官戶科給事中忠直  
敢言榮官龍安同知有遺愛鑾兩任博士皆以善教  
聞兩當志止此三人亦無朝代  
亦無事實欲去之不忍也

文蔚字汝豹萬歷戊戌科武進士精韜畧識天文高  
卧不仕秦王聞其賢聘之往坐語竟日嘆息曰天下



奇士也尋辭歸終日危坐斗室如有所思會蜀亂經畧使強起之參軍務蔚至蜀屢出奇計破敵忽夜觀天象笑曰無以戰也不三日敵必歸命果如言詔敕陝西巡撫賈待問賜蔚指揮劄五蔚固辭詰其故終不言有與蔚善者私詢之曰明祿盡矣三十年後當自知耳

劉邦域秦州人馬世榮清水人世榮貌魁梧力舉百鈞武宗選充前殿正將軍賜一品服邦域天啟壬戌武進士亦偉貌雄力累功至遼東副總兵調征山東直隸秦州新志

卷之十 人物中 十四

叛將李九成恢復登萊又數遷至總兵官懷宗召對大悅賜蟒服玉帶世襲錦衣外銜指揮陞漕運總兵駐徐州控扼南北國儲無虞有關西豪傑之稱

雍周字希武清水人幼聰穎有才畧叔父請爲後父許之及長兩無所依乃自立成家雅意經營遂致萬金販困救急名著隴右嘗行遊天下訪交賢良惟以施與拯濟爲事有逋債不償者皆笑而釋之巡按御史聞其賢置酒飲之屢欲表以官固辭不就及沒貧自若焉從孫康年字安夫博習經史不樂仕進崇孝



行古制建先祠立宗法制祭田修家塾躬行文公四  
禮教訓宗黨著族約會則家鄉禮要二書刊布之  
李芝秦州學生流寇乘夜登城芝挺身擊之傷其魁  
乃退

任希夔徽州學生正德辛未蜀賊攻城垂陷或勸夔  
叱曰忍耻避難國家養士何爲呼鄰人陳鸞等持戈  
巷戰相持竟日遂被害

梁基思陳邦登皆徽州鄉勇也崇正七年流寇至基  
思率兵逐賊至白水江多所克獲後深入重地遂被  
害至死罵不絕口邦登亦與俱戰死

直隸秦州新志

卷之十

人物中

十五

楊其高何養德皆徽州武生崇正十年賊犯境其高  
率義勇何獻祥等戰於銀杏鎮賊大至圍之數重戰  
愈勵矢盡被害養德亦同時戰死

劉大鼎高永高若星張聖化皆徽州生員崇正末  
賊馬科攻城城陷衆欲潰大鼎叱曰避賊走非丈夫  
也挺身先敵矢中額而死永高率子弟力戰被圍殺  
數賊而亡若星亦以城守殉於難聖化博古善詩城  
陷被執賊叱之跪聖化曰吾家忠孝世宦此膝何肯



屈賊奮身自投於火

宋箴徐學孟孫爾丹宋師濂安期晟蔡啟蔭皆秦安人箴庠生性至孝父任同官教諭卒於官箴跣步扶攬歸祖母年九十餘素懼雷箴聞雷卽至其側曰箴在斯無畏也流寇薄城箴奮勇登城立殪數人城破不屈身被數創而殞學孟天啟初恩貢親喪廬墓一年流賊陷城衣冠向北拜畢執刃赴敵死賊感之厝其尸於靜處爾丹亦生員事繼母孝戰死城頭罵賊不絕口師濂亦恩貢幼聰穎尚氣節遇賊不屈奮身直隸秦州新志

卷之十 人物中

共

而亡期晟學生城陷因護母被害啟蔭亦奉母走賊害其母挺身前護之賊感而並釋焉

康天保馬班才邱陵皆清水人天保庠生居弓門寨賊克其堡使從脇以威不屈大罵賊立害之兵巡道李虞夔祭之爲建凜有生氣坊班才童生居代家堡強健有力善騎射賊克其堡欲脇以從不屈賊怒縛於樹樹爲之拔亂箭射之至死罵不絕口陵者邑砌匠爲賊所獲招使攻城罵曰殺卽殺我不挾我城也遂被害



馬根學禮縣人流賊作亂負父出走爲賊所獲根學涕泣請身代父賊遂殺之

王英謝繼昭夏時皆秦州人英秦州衛軍餘少孤事母孝母卒英於廬次跣足負土者三年時暴雨害稼墓側禾稼無損有司上其事詔旌其門繼昭父卒繼昭廬於墓哀痛悲號二年如一日乃有馴鹿產芝之異有司上其事詔旌其門時字尚寅充禮縣弟子員七歲而孤母孀若延師教時時成立事母懇至有孝名母卒時哀慟幾絕旣葬遂不問家事獨廬墓側穴

直隸秦州新志

卷之十 人物中

七

寢匏食僕供薪木者亦不許入墓所每鷄鳴載土于斗坐數於塚而塚大如屋矣有鳩旁穴而巢將禫免孕於穴人以為誠孝所感云州牧段侯表章其事時顧以為恥後貢於京授四川叙州府照磨人頗惜之丁儀魏卿皆秦安人儀宏治初陰陽訓術也割左股以愈父病卿縣學生正德初母喪廬墓三年上官皆獎之

周永康李捷芳馬中漢皆秦州人永康醇朴寡言笑起居有法士多從學焉子肇基克世其德時稱父子



端方捷芳與弟連芳皆有孝行親沒皆毀瘠兄弟終身無間言中漢端方有矩少年不正冠不敢過

蒲一鵬字雲程秦州諸生兄鵬因事罹法獄已定鵬年十九步隨巡按御史泣訴寬二載卒得釋崇正七年秦大饑鵬出粟賑濟活人甚夥

王祗徽州生員事繼母孝秦俊高汝價任典膳皆徽

州人皆以孝行旌

縣志無舊直隸秦州志有

劉綏吳瑄孫居業皆秦安人綏廬墓三年瑄貢生七歲離母哀慟備極事繼母至孝宜仕矣以繼母老不

直隸秦州新志

卷之十

人物中

六

出居業幼失父事母孝母沒亦廬墓三年皆旌其門

頓謙張孔教杜漸雍浹宮程範皆清水人謙字伯亨

邑學生少喪父事母至孝母疾醫索人肉和藥謙割

股以進母終廬墓三年孔教字師聖亦庠生父喪明

母多疾孔教口侍左右未嘗離及卒亦廬墓三年漸

者邑省祭官也善事繼母四人者官皆旌之浹宮亦

庠生事親亦孝亦廬墓三年範亦庠生事親能孝及

父沒穴居墓側朝夕茹淡以首負土築成高墳

趙一巖張肇慶薛國魁皆禮縣人一巖國子生入都



歷監止少一日聞計人勸俟次日報喪監事完矣一  
歲不從歸廬墓三年肇慶縣庠生以孝義稱國魁與  
弟學生國佐友愛無間上官皆旌之  
潘宏秦州人成化間輸粟千石以賑饑賜冠帶  
蔡廷棟張友雍宋師聖皆秦安人廷棟家無餘財崇  
禎二年饑盡出藏粟百石以賑上聞命以義官錫冠  
帶友雍增生崇正十三年罄得粟二百石賑饑師聖  
學生寇陷城輸貲修葺綏恤士民皆被旌

皇清

直隸秦州新志

卷之十 人物中

九

楊名顯秦州人前明舉人順治中除山西山陰令以  
治最行取刑部主事進郎中恤刑山東多所平反後  
出爲廣東布政使故事布政使差官催查糧儲需路  
費孔多州縣內金司庫每千兩加火耗十之一名顯  
悉除之凡歲省民財數十萬後卒官有二子皆襁褓  
其母高氏直隸大興人也或勸高挈子北歸就母家  
高不可扶輿歸秦州訓育二子皆成立人稱焉長子  
延由蔭生歷官至撫州通判

路坦然字居易明末鄉試副榜棄不屑順治八年復



由 恩貢授襄陽縣丞以能陞真定府同知駐赤城  
堡赤城兵民雜處俗悍勁坦然爲立三老教禮讓捐  
俸設學宮俗遂馴焉隨署保安州活無辜罹罪者三  
十餘家陞福建延平知府府屬之沙縣民頑且盜有  
司不能制乃請以叛民襲之坦然不可卽諸縣所化  
導之重懲其魁餘皆使歸農府治有楊龜山李延平  
廖德明朱晦菴四先生祠年久頽廢祭田被侵蝕坦  
然皆爲釐正索四子後裔令主其祀後致仕歸所著  
書有讀易心得擬請尊先賢有子疏子四人其三皆  
直隸秦州新志

卷之十

人物中

三

工書畫能詩稱佳公子云

雷蛟字鳳飛秦州回民也材武絕倫崇正十三年闖  
賊掌律王者既陷秦州欲屠之約以時日密甚蛟偵  
得之夜訣其父曰兒欲活我秦人事成則城全不成  
我先族矣父許而遣之蛟出卽於是日突殺掌律王  
隨反令城中居民家各殺賊賊殲焉以功授遊擊十  
五年與指揮于光耀擊賊武大定於東關賊馳去

國朝順治三年盜擾伏羌蛟自請總兵請兵三百夜往  
擊賊力戰二日夜卒破之知伏羌白粹然率士民來



秦州製錦稱觴爲蛟壽功上

詔賜金牌

蔡啟允胡肅馮皆秦安人啟允兒時知禮讓食必待親長補邑學生盡通五經士多從之學教人以孝弟爲本行義爲實於文辭不屑也性至孝非授徒接客未嘗去親側明末流寇陷城獲其母啟允哀號請代寇感而釋之旣游經亂離而其父母皆高壽遂養親不仕時蓋以李穀君顯方講學而啟允同懷弟爲蓋屋儒學官啟允因遙拜寄書實所疑數有往復顯以爲畏友其卒也顯爲題其墓肅馮字顯京亦邑學生直隸秦州新志

卷之十 人物中

二

初隨其父官華陰而母卒於家日夜徒步奔喪倚廬三載不見人比見人髮盡脫形容骨立矣敬愛二兄無間言兄子將輸貲爲監生肅馮鬻其田而助其費性冲和能飲酒不亂工爲詩文書法超脫似亦六朝人而繩趨尺步訓人必以禮其卒也邑爲罷市縣令親哭奠焉

胡景馮字翼京明兵部主事多見元孫肅馮長兄也生前明崇正中乾隆元年卒年九十有七其年卽蒙國恩授修職郎賜冠服云景馮監生性耿介平生寡



笑戲老益端謹八旬猶未杖能作蠅頭細書坐於街人以其先朝遺老也正冠乃敢過景馮輒起立拱揖不少倦縣令頻遣侯安否方年六十時妻王氏先卒不再娶塊然一榻口授諸孫經爲樂凡三十年王故名家女敦禮法姑生幼子王蓐寢牀下者踰月燕私疾病未嘗不裙裳後馭子婦嚴弟妻姪婦皆憚焉

蒲璋秦州人誠篤力學幼多目疾使人讀書於旁輒聽而記之登順治丁酉舉人授富平教諭時富平李子德翰林與蓋屋李頤郿縣李栢號關中三李相與

直隸秦州新志

卷之十 人物中

三

講學璋朝夕與從學益粹陞肅州衛教授邊方文教朴畧孔廟圯弗治璋捐俸重修教諸生以衣冠禮讓教化興焉子四次子本澤三子本清少子本馨皆有名

本澤耿介而善讀書論史有識以監生授縣丞職効力淮南河工會大病病起歎曰區區之官不足爲功於世而徒害乃身卽歸種竹栽花以自樂本清七歲能屬文十六補弟子員尋食餼以歲貢官韓城訓導課訓無虛日曾署縣事有善政其歸也韓城人爲立



去思碑本馨性好學閉門謝客不問生產著易經文  
百篇課子弟康熙丁酉舉於鄉讀書益力五會試不  
中而旅卒衆咸惜之

蒲珩字佩珩秦州人幼聰慧博學能文登順治辛丑  
進士故大學士張玉書戶部侍郎李仙根皆同年生  
珩日與切磨文益有名後授廣西藤縣知縣獎善懲  
奸有政聲時吳三桂逆節已著珩懼將辭官會丁外  
艱計至而兵已起事平乃得歸遂高隱不復出初珩  
勤於學午日家人進角黍置錫器於旁珩日觀書手  
直隸秦州新志

卷之十

人物中

三

取角黍誤蘸硯池水中食之盡州判王際有由翰林  
降官也多閱士人文歎曰嗟乎秦無人達者惟蒲氏  
子乎已而果然

徐世節字心白學孟子也幼讀書好古順治丁酉舉  
於鄉庚戌會試總裁栢鄉魏裔介古肥龔鼎孳閱其  
文擬置第一以後場悞帖遂下第榜後魏龔二公先  
請見之作詩紀其事世節知帖者悞也欲擊登聞鼓  
以自直當事患之許以保留史館世節不欲就拂袖  
歸後選江西石城知縣革積弊修城垣平益價嚴租



稅儉以自奉而勤於牧民石城人愛之數年致仕歸方在官時臨川徐氏執譜來序宗祧世節以臨川石城相鄰而徐氏臨川巨家也拒勿通著有易學講解四書釋諸書

胡恒升字九如太常卿忻之孫也五歲而孤哀毀若成人長由博士弟子貢太學得授州同職以養母故不出仕性好施嘗分田廬資其內兄王姓於遠鄉捐地置義塚二康熙初吳逆變後其族人多失業州東馬跑泉恒升有水田五百餘畝盡分畀之至今賴養

直隸秦州新志

卷之十 人物中

四

焉州牧吳自性卒於官子元珍繼沒貧不能歸而又無葬地孫廷宣日夜哭恒升慨然呼謂曰吾適買得塋域善地盍葬諸廷宣叩首出血聞者咸感泣方吳逆之亂靖逆侯張勇至秦與恒升語大奇之檄令宰狄道且欲聞諸朝恒升竟以母老堅辭不仕卒其兄子志寅

志寅字書咸亦孝友善施九歲孤苦粥如禮順事王母及母事叔如父叔亦視如子既長亦由諸生入太學考授縣丞未補官會秦饑穀踊貴富人多乘時居



奇志寅醜之悉出其廩藏徧周貧乏或負錢數十貫將破產以償志寅聞急還其券人稱盛德云

萬掄字穎先秦州人早慧四歲時其父書一文契賦示之曰兒能讀此乎掄應聲讀之成句比就傳通經義旁涉孫吳釋老書稍長苦貧挾書走河西詣靖逆侯張勇軍門上謁勇問孺子乃欲求功名於亂世乎掄泣曰某親老家貧願効尺寸於麾下得錢帛爲奉親計耳勇幙下多才有宋石之者尤奇士也掄與遊從十餘年盡得其天文地理孤虛兵陣等學吳三桂直隸秦州新志

卷之十 人物中

五

王輔臣變陷隴右郡縣已皆收復時勇得轉置守宰欲以軍功命掄掄固辭但受金幣歸歸乃重爲時文補弟子員食餼積分貢於國學其父母已前卒而掄亦老矣諸達官爭招之多不往往亦不久留後生卽叩天文等學者輒訶之曰儒者不講孔孟書顧事此爲晚年尤和易新歲題門帖故爲俚語鄉人聚觀笑譁掄大喜語所親曰吾身老子幼懼吾門之如水也且使後人常談我也

趙修士字廉儒秦州學生骯髒有骨氣性孝友樂易



多隱德初最工文章使者邀之閱試卷清水知縣張仕渾名進士也嘗邀共論經史修士談鋒娓娓聽之忘倦終歲多留署中後因父病棄舉業習醫書遂精其業所全活甚衆父沒幼弟未周粹時修士新娶婦卽飲下乳藥令哺之修士家故貧而有外孫女寄其家婦曹與夫同志拮据育成而嫁之修士嘗拾金於道追還其人或負修士金病且死修士亟還其券其行率類此于西

西字文山幼穎敏弱冠補諸生有文名旣長魁貌美直隸秦州新志

卷之十

人物中

六

羣望者異焉以選貢入國子監大司成孫文定公嘉淦器重之歷數年叙功試吳堡縣令末期用治最調延長延長民多輕生小故輒自投山崖西幼習父訓亦明方脈先醫使愈而後法德之俗遂革內艱服除補江南寶山寶山初立縣西始爲創修學宮壇廟之屬復爲開河道築海塘便民之政以次修舉會海潮闔境漂沒西拯救有方民獲安陞太倉知州旋陞淮安知府淮安水鄉無紡織西爲招寶山民教之利遂興已而調蘇州蘇劇郡績弊西強明幹濟力爲釐剔



諸務條舉弊絕風清會以他事望誤遂去官 命馳  
往軍營效力姑數年 上思其治行且復用之會病  
卒於家

吳炳劉徽典高我猷皆秦州人炳家世指揮少文學  
炳又聰穎善讀書補州增廣生善教人每課交榜塾  
門嚴如官試士平居與論學業則談笑自若性通音  
律琴瑟笙簫之屬皆在御與讀書聲閒作也子殿夔  
殿岳皆名諸生善教人徽典者貢生耿介不隨士人  
服之多從遊焉我猷喜讀書而性嚴整行步不苟亦  
直隸秦州新志

卷之十

人物中

一七

善教人多成立

梁必擢劉世名皆秦州人必擢家傳孝謹五世同居  
妻陳氏主家五十餘年長幼百口無間言世名武人  
也功加叅將授秦州營把總其父先以饑亂負人數  
百金父卒日久人亦不索償矣世名盡所得銀糧以  
償之與弟芳名同居弟好用財世名絕不檢校

吳殿契秦州人張懷智秦安人殿契常拾金訪還其  
主冬夜偷兒來穿屋呼告曰天寒胡爲此好去吾不  
洩也後遠出遇盜中一人止衆勿前卽向偷兒也殿



契更遺之金其人卒爲善士懷智於路拾金百追還之

韓遇春清水人諸生時貧甚苦讀書芒屨走千里應試後成進士官知縣其所作藝文人多誦法

蔡曰逢字方卜泰安人幼聰穎十二學爲文下筆驚其長老旣長偉貌長身美鬚髯補弟子員高安相國朱文端軾督學陝西置高等食餼癸巳聯捷成進士總裁張相國鵬翮趙尚書昇喬皆清望也選度吉士散館授檢討雍正初以詞臣上疏言事蒙 召對稱

直隸秦州新志

卷之十 人物中

六

善者再除監察御史會 上方用詞臣出知郡時朱

文端已相國矣卽薦曰逢 特賜奏摺馳驛往入境

見歲荒民流不待 聞先檄所屬發倉粟以賑登州

濱海多盜曰逢訪得其魁繫質之盜發卽責其收捕

用是邵境寧息數年法度整肅風俗清美乃設蓬萊

書院教育士子而賢才興焉因屬縣事呈悞左遷刑

部現審司再謫軍營効力起補兵部武選司累擢郎

中每白事堂上堂官知其老翰林也皆敬之曰逢自

以衰年淹滯部曹抑鬱不自得卒於仕



侯承運秦州人張祖敬秦安人承運閉門謝客誦時  
文尺許而爲文簡淨無浮詞康熙癸巳科旣中式矣  
而後場被貼同考官作詩以惜之祖敬尤篤學於經  
書義疏能成誦及門士最多康熙辛卯科同考官首  
薦而主司以兩字之嫌置之同考亦爲賦詩以志恨  
敬祖後官寧夏訓導而承運以貢生終

何潛字耀如秦安人性明敏耿介家貧力學由選貢  
令湖南善化縣調新寧上官以積歲疑獄委之輒剖  
決得情民無冤用是聲譽大起陞辰州鳳凰營通判  
直隸秦州新志

卷之十

人物中

元

艱歸起補山西汾州府判攝直隸遼州事所至有名  
蹟潛初爲縣用聾者司閤而身坐後堂以觀書人不  
得與聞者私語故弊絕風清比判辰州有小吏爲民  
所訐潛審實其罪勒於碑在遼州時惡某吏日之貪  
瑣也被酒輒歷數其過端揚聲大罵人或議潛母乃  
過甚然亦見其清直足以服人卽吏目亦無從置喙  
云食三年

王君佐呂都甫楊殿祚沈爾綉皆禮縣人君佐監生  
也年十四隨父遠行偶在後父爲賊縛君佐追呼請



命賊釋之父喜施與君佐謹承父志族黨多周恤康熙五十七年協助軍粟紓民急兩次輸數千金捐修文廟乾隆七年捐社糧百石都甫三歲失母九歲繼母病號泣數日不進食既壯母復病入深山覓藥性亦好施上官皆旌之殿祿少孤事母孝知縣表其閭爾綉者增廣生員亦好賑貧乏

王幼貞秦安庠生早失母事父兄有至性父官渭南訓導幼貞隨之而其兄在家父與之金錙銖盡寄兄曰兄主家我奚用此父卒官步扶喪歸朝暮奉起居盥饋如生時事兄如父嫂如母兄嫂不食不食也不幸早卒人咸痛惜之

直隸秦州新志

卷之十 人物中

三

直隸秦州新志卷之十 人物中終



直隸秦州新志卷之十

人物下

列女

舊志因上官皇后立后妃紀殊非志例茲以列女統入人物則就論之詳矣顧其中有夫與子見厥後或不載者若姜趙待李之屬一則以史稱天水冀人冀為今伏羌不屬秦故闕若其母及妻節烈不可泯而他志或不詳且安知其當日聯姻天水之非今日之秦即其夫居子亦得附以傳焉一則因其潛竊稱號非所以示後輒抑置雜記中然婦人從一義不存乎升黜也仍依世次如左

漢

孝昭皇后上官氏上邽人語見雜記上官桀傳

直隸秦州新志

卷之十 人物下

一

魏

姜叙母者天水姜伯奕之母也建安中馬超攻冀害

涼州刺史韋康叙時為撫夷將軍屯歷城叙姑子楊

阜故為康從事間出過歷候叙母因要叙與其圖超

叙母曰咄伯奕韋使君遇難豈一州之恥亦汝之負

豈獨義山哉

義山阜字

汝無顧我事淹變生人誰不死死

國忠義之大者但當速發我自為汝當之不以餘年

累汝也叙等因共起兵超既敗襲破歷城得叙母叙

母罵之曰汝背父之逆子殺君之桀賊天地豈久容



汝而不早死敢以面目視人乎超怒殺之阜等以狀聞太祖甚嘉之手令報曰姜叙之母勸叙早發明智乃爾雖楊敞之妻蓋不過此賢哉賢哉良史紀錄必不墜於地矣

趙昂妻異者故益州刺史天水趙偉璋妻王氏女也昂爲羌道令留異在西同郡梁雙反攻破西城害異兩男異女英年六歲獨與異在城中異見兩男已死欲自刎顧英而歎曰身死爾棄言誰恃哉乃自以溷糞涅麻而被之眇食瘠形自春至冬雙與州郡和異

直隸秦州新志

卷之十 人物下 二

竟以是免難昂遣使迎之未至三十里止謂英曰婦人無符信保傳則不出房闈昭姜沉流伯姬待燒每讀其傳心壯其節今吾遭亂不能死將何以復見諸姑所以偷生惟憐汝耳今官舍已近吾去汝死矣遂飲毒藥而絕時適有解毒藥良湯撇口灌之良久乃蘇昂轉叅軍事徙居冀會馬超攻冀異躬着布鞬佐昂守備又悉脫所佩環黼黻以賞戰士及超攻急城中饑困刺史韋康素仁愍吏民傷殘與超和超遂背約害康又劫昂質其嫡子月於南鄭欲要昂以爲已



用然心未甚信超妻楊聞異節行請與讌終日異欲  
信昂於超以濟其謀謂楊曰昔管仲入齊立九合之  
功由余適秦穆公成霸今方社稷初定治亂在於得  
人涼州士馬廼可與中夏爭鋒不可不詳也楊深感  
之以爲忠於已遂與異重相接結昂所以得信於超  
全功免禍者異之力也及昂與楊阜等結謀討超告  
異曰吾謀如是事必萬全當奈月何異厲聲應曰忠  
義立於身寧君父之大耻喪元不尾爲重况一子哉  
夫項託顏淵豈復百年貴義存耳昂曰善遂共閉門

直隸秦州新志

卷之十 人物下

三

遂超超奔漢中從張魯得兵還異復與昂保祁山爲  
超所圍三十日救兵到乃解超卒殺異子月凡自冀  
城之難至於祁山昂出九奇異輒參焉

舊志又有羊  
鮪妻辛氏考

晉書但云隴  
西人今闕疑

晉

苻堅妻張氏不知何許人

從其主  
載於此

明辯有才識堅將

寇晉群臣切諫不從張氏進曰妾聞天地之生萬物  
聖王之馭天下莫不順其性而暢之故皇帝服牛乘  
馬因其性也禹鑿龍門決洪河因水之勢也后稷之



播殖百穀因地之氣也湯武之滅夏商因人之欲也是以有因成無因敗今朝臣上下皆言不可陛下復何所因也人君有伐國之志者必上觀乾象下採衆祥天道崇遠非妾所知以人事言之未見其可諺言鷄夜鳴者不利行師犬群噪者宮室必空兵動馬驚軍敗不歸秋冬已來每夜群犬大噪衆鷄夜鳴伏聞廐馬驚逸武庫兵器有聲吉凶之理誠非微妾所論願陛下詳而思之堅曰軍旅之事非婦人所預也遂興兵張氏請從堅果大敗於壽春張氏乃自殺

直隸秦州新志

卷之十 人物下 四

苻登妻毛氏不知何許人亦從夫載壯勇善騎射登爲姚萇所襲營壘旣陷毛氏猶彎弓跨馬率壯士數百人與萇交戰殺傷甚衆衆寡不敵爲萇所執萇欲納之毛氏罵曰吾天子后豈爲賊羌所辱何不速殺我因仰天大哭曰姚萇無道前害天子今辱皇后皇天后土寧不鑒照萇怒殺之

呂纂妻楊氏宏農人也同前美艷有義烈纂被呂超所

殺楊氏與侍婢十數人殞纂於城西將出宮超慮賫珍物出外使人搜之楊氏厲聲責超曰爾兄弟不能



和睦手亦相屠我旦夕死人何用金寶超慚而退又問楊氏玉璽何在楊氏怒曰盡毀之矣超將妻之謂其父桓曰后若自殺禍及卿宗桓以告楊氏楊氏曰大人賣女與氏以圖富貴一之已甚其可再乎乃自殺時呂紹妻張氏亦有操行年十四紹死便請爲尼呂隆見而悅之欲穢其行張氏曰欽樂至道誓不受辱遂昇樓自投於地二脛俱折口誦佛經而死

李嵩妻尹氏天水冀人也幼好學清辯有志節初適扶風馬元正元正卒爲嵩繼室以再醮之故三年不直隸秦州新志

卷之十 人物下

五

言無前妻子踰於已生嵩之創業也謨謀經略多所毗贊故西州諺曰李尹王敦煌及嵩卒子士業嗣位尊爲太后士業將攻沮渠蒙遜尹氏謂之曰汝新造之國地狹人稀靖以守之猶懼其失云何輕舉闕冀非望蒙遜驍武善用兵汝非其敵不如勉修德政蓄力以觀之彼若淫暴人將歸汝汝苟不德事之無日矣此行也非唯師敗國亦將亡士業不從果爲蒙遜所滅尹氏至姑臧蒙遜勞之對曰李氏爲胡所滅知復何言或諫之尹氏曰興滅死生理之大分吾一婦



人不能死亡豈憚斧鉞求爲臣妾乎蒙遜嘉之不誅  
爲子虔茂娉其女及魏氏以公主妻虔茂尹氏及女  
遷居酒泉女卒不哭撫之曰汝死晚矣沮渠無諱鎮  
酒泉謂尹氏曰后諸孫在伊吾后能去不尹氏曰子  
孫流漂託身醜虜老年餘命願死於此不能作疆表  
鬼也俄而潛奔伊吾無諱遣騎追及之尹氏謂使者  
曰沮渠酒泉許我歸北何故來追汝可斬吾首歸終  
不迴矣使者不敢逼而還年七十五卒於伊吾

唐

直隸秦州新志

卷之十 人物下

六

盧甫妻李氏秦州成紀人父瀾永泰初爲斬令梁宋  
興兵界內有劇賊數十人瀾挺身入賊結以誠信賊  
並降附百姓復業徐州刺史曹昇知賊降掩襲之賊  
得脫入縣疑瀾實已執瀾及其從父弟渤兄弟爭相  
代死女見父被執亦請代父死並爲賊所害宣慰使  
李季卿聞狀詔贈李孝昌縣君瀾渤並贈官  
舊志有龜妃上官氏考新書云下邳人也今闕疑

五代

祝英臺梁時人幼爲男子飾習儒業與梁仙伯同學



三年伯不知其女也然祝心許伯伯亦無他娶及學成歸父母已納馬氏聘矣祝志惟在伯伯聞而志以卒窆邦山之麓祝適馬經其墓託以拜辭墓忽開祝遂躍入而合塚焉事出小說莫詳真偽姑依舊志錄之

宋

曹氏徽志載之從父戍清野原元人來攻城陷父死氏徒步號泣獲其尸一慟而絕教憐之僉其父瘞焉鄉人建祠祀之

元

直隸秦州新志

卷之十 人物下

七

米氏亦見徽志夫早卒誓守志躬紡績以事舅姑垂老不懈至元十五年旌其門橫川有墓在焉

成紀謝思明妻趙氏夫亡自髡其髮誓不更嫁有司爲請旌之

明自此以下乃分州縣世近而人多也

秦州

費廷珍曰余於修志之初論持簡括見爲節婦傳者數曰詔旌其門謂此盍都爲一類而題曰已旌其未旌之類附焉可乎旣而編纂及之乃怦怦其有動也



夫此輩筮髮半生荼苦惟藉數語以傳汰冗芟繁雖  
云惜墨而一字一珠能無鬼泣歎且房幃行誼豈有  
他竒畛域區分幽潛含恨矣茲故不復差別第就原  
文加訂正焉俾閱者因文見義亦足以知其境之所  
適有幸有不幸耳嗟乎黃墟矢志久已爰歸姓字猶  
存均光典册又豈以旌不旌爲軒輊哉

千戶阮泰妻楊氏泰卒天順八年氏年二十三幼子  
在抱撫之五十餘年壽七十有五

指揮陳耀妻馬氏守節終身正德中旌表

直隸秦州新志

卷之十 人物下

八

千戶高鵬妻趙氏鵬早卒事姑撫子至老靡他正德  
時旌表

指揮向璽妻堅氏堅守苦節終其身嘉靖中旌表

安克慈妻劉氏撫二孤守節州牧爲之建坊

郭進妻張氏二十五歲夫亡甘貧守節四十餘年州  
守以聞旌之壽六十有六

吳從道妻王氏夫卒王誓靡他撫幼子昭成詔旌其  
門

李書勤妻高氏十六而寡欲殉不得家赤貧而節益



堅歷五十餘年鄉閭義之御史題旌

張緒妻王氏撫二孤以守節詔旌其門

先是知州絃特表之

翟文妻李氏自二十歲苦守數十年如一日有司表之得與旌

楊景和妻何氏二十五守節以至於老

楊一乾妻黃氏年二十孀居至老不變

李勇妻劉氏年二十二守節至老

軍餘尹政妻祿氏撫孤子自二十五歲為始云

指揮尹正妻徐氏夫死於陣無子氏年二十一厲志

直隸秦州新志

卷之十 人物下 九

守節

千戶王鳳妻高氏早寡守節撫二孤子御史臺核實

未報

舊文如此省志云有司以闕其後之事歟

舍餘黃欽妻謝氏年二十四守節有司未之舉

舊志原文

按軍餘舍餘皆衛卒之名目也或以軍餘尹政訛為徐尹正今併考正之

趙良妻劉氏良卒劉尚少孀居數十年有司表之

郭祐妻孟氏少適祐祐病篤孟曰子未死妾心先死

矣第二子在抱不偕死耳時方二十家貧甚日績麻

拾禾以撫孤年八十卒巡按御史為詩輓之

侍御曹漢詩刻



於石舊志載禮縣人而省志八州從夫歟抑冢家也

西和縣學生李蘭繼室胡氏淇仲女也蘭元配姚遺子邦乾及女皆幼胡撫之不啻已出蘭卒胡年二十七乃斷髮閉帷飯蔬飲水三十餘年年五十九卒州人亟稱焉舉之當路而邦乾貧不能任竟未旌

馬奇華妻唐氏孀居守節有司表之御史臺覈實以聞其鄉人曰可謂堅志不移以節終年者

張彥真妻李氏彥真死守節不失

學生吳卿妻楊氏年少孀居守節至老

直隸秦州新志

卷之十 人物下

十

張彥麟妻何氏彥麟死矢志靡他

劉景志妻王氏年少守節至老不渝

馬體健妻姚氏年二十有三孀居數十年而終

鄭永銘妻姚氏永銘死姚以死自勵誓不改適以壽終焉

百戶王璵妻石氏夫死誓不貳事侍舅姑撫幼子終身

袁敬妻李氏敬早死李以節終

謝子顯妻張氏年二十七守節至老無失



鄧鶴妻毛氏從少孀居至老詔旌其門

農民汝希孔妻雷氏有姿容崇正七年流寇至三陽川被虜迫爲婚氏給之間出自縊死州人亟稱之

### 秦安縣

永和王妃姓王氏知州福女也福在蒲王聞妃聰慧禮求之因册爲妃云

關士毅妻王氏夫早卒無子王誓以死不更事他姓事姑柴氏孝家且貧王紡績以自給人不堪其孤苦而王自若也宣德間有司上其事得表其門云

直隸秦州新志

卷之十 人物下

十一

監生李玘妻周氏夫亡矢死不貳以女紅傳諸女黨日藉以自給逾五十年卒

伏友英妻張氏年二十守節至老

王愷妻李氏年二十愷卒遺腹生子環李力農撫孤繼親黨亦不輕見如是者六十年年八十卒縣尹楊

綸獎之

舊縣志又有李蘭妻胡氏什邡公女而註蘭秦州人今從省志已載入州

董碧妻李氏年二十三卽孀居遺孤子庠生克家亦早卒李耕織寡處而節愈厲人莫不難之年六十有五嘉靖癸巳縣尹亢世英上其事得旌其門



李繼妻鄭氏少適繼生子去驕繼卒鄭年二十五誓不貳日績紡自給教去驕成立年四十去驕死遺孫浹方週歲鄭復撫之甘貧以老縣令旌之年七十有三矣

貢生成三俊妻梁氏伏羌人通判之女也三俊鄉試擬魁以策觸璫忌抑置副榜遂抑鬱而卒梁年二十四撫子惠吉迪吉俱食餼於庠

生員張登縉妻王氏年二十流寇陷城欲辱之厲聲罵賊自刎而死有司表其門

直隸秦州新志

卷之十

人物下

三

生員孫丕顯妻雷氏事翁姑至孝流賊傷其姑雷戟手痛罵觸石死有司表之

孝子孫居業妻武氏堅貞守節撫子爲儒

生員蔡兆魁妻黨氏年二十無子守節終身有司旌之

甘州學正王卿妾楊氏生員王景陽之母也年二十六先已寡流寇入其家逼之不從誘之罵益厲奔入井中死

清水縣



孝子生員頓謙妻雷氏以節自守訓孤子有成人稱節孝萃一門云

柳盡性妻李氏年十八喪夫又無子以死自矢更無異志後撫姪爲嗣以供先祀爲人所難

庠生王桂妻馬氏年最少而寡哭夫喪明卒撫孤以老

庠生周訓妻李氏家至貧畧無厭心夫沒親族憐其苦勸之嫁終不易節

杜邦基妻崔氏年十九守節撫孤有成

直隸秦州新志

卷之十

人物下

十三

邑學王之耳妻雍氏年二十而夫亡哭之瀝血撫遺腹子至於成立終身不改縣令旌之

孫攀妻張氏年十九守節撫孤終身不易貞靜賢孝巡撫給匾旌之

劉仲妻柳氏二十五歲守節歷五十八年子亦成立巡撫旌之曰慈節成嗣

韓丙妻薛氏二十卽寡誓不再醮撫子成立鄉人稱之

曹邦彥妻樊氏少喪夫家貧守節撫孤有成蓋亦人



所難能也

生員李翰傑妻王氏年二十而夫亡苦節自矢育子成名

禮縣

趙永妻孫氏夫亡時年甫二十乃斷髮刺目以自誓遺子翰方一歲鞠育教誨由貢生任寧海州判詔旌其閭

楚佐妻張氏佐卒張最少遂蓬首閉戶以老

魏景芳妻李氏十九而寡屏絕服飾人無見其笑者

直隸秦州新志

卷之十

人物下

十四

年八十卒有司旌之

廩生劉密妻趙氏夫死氏年二十有六長子二歲次子三月誓不再嫁撫孤完節焉

趙貞妻趙氏二十而寡生子纔三月力貧撫之

獨士宏妻魏氏二十而寡有子始週時族有激使嫁者魏指其孤曰所以不死上有翁下有此耳不然吾早自盡矣人乃不復敢言及翁卒力課其子人謂孝

慈葉盡云

獨或作弘士  
今從其縣志

徽縣



贈員外郎郭璣妻淡氏夫早卒恐璣力困自活艱辛萬狀撫遺孤垂三十年鄉里無間言知州白松以聞詔旌之後誥贈太宜人

杜志賢妻閔氏子歸未幾志賢卒閔適有身或諷使他適閔曰吾義不二天况有娠乎果生子貧苦萬狀終不改節六十餘年以壽終

鄧錦妻趙氏少寡遺孤襁褓撫之成立垂四十年嘉靖中壽終

生員郭從先妻黨氏年十九而夫亡焚香自誓守節直隸秦州新志

卷之十

人物下

十五

四十年人咸以貞孝稱之御史鄭存仁奏得旌

臨城知縣郭師游妻楊氏游卒於官楊飲醜欲死以救甦者紳喬若雯等勸以撫孤大義乃不死奮然扶觀歸治生訓子門庭肅然邑人羅世錦詩詠之

生員郭維錫妻楊氏年二十二誓死撫孤垂五十年冰霜自勵有司旌之

郭僑妻盧氏僑疾革謂盧曰君年少無子我死可速嫁盧誓不再適竟以節終

于一化妻許氏幼誦書知大義十七歸一化未三歲



夫亡子尚幼每提抱間爲人傭績以葬其夫撫子成立年八十餘旌其門

生員郭維亨妻李氏年二十四撫孤垂六十年以壽終

生員張統妻任氏自二十一歲守節事其翁姑翁姑卒殯葬如禮亦以壽終

何才妻楊氏時值寇亂才病篤謂楊曰家貧子幼時又多難吾死目不能瞑楊曰妾稍有負泉下難相見也才卒揚於亂離中携孤跋涉備嘗艱苦卒撫之成直隸秦州新志

卷之十 人物下 六

王烈女名枝兒州人王文女也年十八蜀寇入徽父兄被殺又以刀脇枝兒欲污之枝兒哭罵不從遂遇害州人爲立祠祀之

尚天麟妻周氏蜀寇入徽夫婦避難至岐亭遇盜麟脫周爲所執強挾馬上周力投於地再挾再投大罵不絕遂遇害

呂舉妻劉氏夫卒痛哭終日飲醢而死當事奏旌之立碑於墓



貢生孫光先妻羅氏光先赴廷試歿於寶雞旅邸羅  
迎柩歸治喪事別治一棺開擴倍大將葬欽醜死遂  
合窆焉事聞詔旌之

狄道教諭孫賢妻杜氏生子三而寡均撫之成流寇  
馬姓者攻陷徽杜挾幼孫避鐘樓下賊奪殺其孫杜  
瞠目大罵擊以石賊亂刃之

生員馬聰妻邵氏崇正八年攜二女竒兆跟兆避賊  
賊追及河強挾之邵及二女罵賊投水死

生員郭篆妻郭氏年二十篆歿茹苦守節四十餘年

直隸秦州新志

卷之十

人物下

十七

教子成立以壽終

邢世耀妻張氏事夫恭世耀病革謂張曰爾年少難  
獨守其思自全張誓以從死耀止之及卒既成服與  
所親道其喪共相慰阻張佯應之至夜跪縊耀棺下  
入我

朝督學道朱巡按輯其請 旌之

兩當縣

廩生侯清妻張氏少有德操相夫甘貧未幾而寡矢  
志不渝教子侯紹周考選縣丞嘉靖時表其門曰節



比孟光歲給米絹壽七十三而終  
黃烈女庠生黃元凱之妹崇正丙子有流賊大天王  
高者聚黨嘉陵江劫女欲污之女大罵不屈冒刃死  
時年纔十許云

皇清

秦州

監生胡汝薦妻王氏廩生胡汝英妻周氏庠生胡璿  
妻路氏俱系出儒家汝薦汝英爲胞兄弟明太常卿  
忻之子也並早卒王與周相勵守節時闖獻二賊蹂  
直隸秦州新志

卷之十

人物下

六

躡隴蜀秦爲出入要衝州人士奔竄戎馬間求生且  
不得王氏手提數歲兒負其祖父木主周氏則籍先  
世遺書以從崎嶇山谷百餘里匿石室中乃免於難  
璿郎王氏避兵時所手提五歲兒也比長教之學娶  
於路氏獲入泮尋亦卒路氏者秦安人其父坦然爲  
福建延平守或勸之嫁路勃然曰吾二姑氏當亂離  
時且能作兩黃鵠我生太平乃不能孤雁飛耶事二  
孀姑無稍倦後經吳逆之變亦全其節訓子志實讀  
書入太學一門三節人稱至今當事者咸旌異之



楊啟泰繼妻張氏年十七適泰克修婦道鄉里稱賢  
吳逆之變氏避難南山中遇賊於龜峯山巔舉家散  
逸氏與弱子女被執泣曰寧死不受辱遂抱一子二  
女投崖下及暮家人跡之氏已死子女無恙人咸嘆  
異云

韓昌有妻李氏值逆變遊兵四掠氏年二十二以負  
幼子遁避爲賊所執氏連批賊頰罵不絕賊怒刃之  
身受七創氣不少挫以頭骨未斷至夜復蘊七日而  
絕其夫葬之手植二松於塚曰以標氏節時康熙十  
四年六月十二日也

直隸秦州新志

卷之十 人物下

十九

閔舉妻常氏舉得疾暴亡氏痛哭幾絕夜分自縊

四川副將呂錦妻馬氏守節四十年治家嚴肅教子  
讀書又建義學教呂氏族中子弟子誠陽中副車謫  
陽候銓縣佐年七十一猶及見諸孫爲生員

張曙妻鄧氏佐夫奉親色養喪葬靡缺夫歿氏年二  
十餘子幼家貧紡績自給年八十餘如一日

陳經疇妻楊氏孀居三十餘年教子鈺錦俱入泮學  
使者逢州牧孫均榜其門太史鞏建豐爲之贊



張峻鳳妻侯氏夫卒遺子璘五歲次子玠在襁褓氏痛哭欲殉其姑勸止之葬夫畢茹荼緝績仰事俯育四十餘年二子俱遊泮郡人與陳母同稱陳克道妻胡氏早寡遺孤三省甫四歲氏歷盡艱辛撫育成之食餼郡庠壽七十三

郭邦域妻王氏夫卒撫二子肇周繼周成名肇周復早死氏撫遺孫尤劇年七十六勤勞不倦

王瑜妻張氏未三十而寡力貧以事舅姑教養四子備極劬勞歷十六載舅姑繼歿張哭泣亦死人莫不哀之

直隸秦州新志

卷之十

人物下

三

農民王詔妻李氏年十七適王事孀姑至孝後詔客死成都姑憐其少且無出欲遣嫁氏號泣誓以死守卒成其節

鄒守業妻馬氏年二十四而夫亡家貧矢志撫子成立苦節三十六年雍正十年獲表

贈文林郎趙修士妻曹氏有婦德事舅姑克孝姑病內瘍不能卧曹扶掖背負百方凡四十餘日姑歿有幼子在抱曹年十九未育子乃以藥下乳乳之鄉里



傳爲異後其子酉以選拔任延長令獲遇

覃恩封爲孺人年六十二卒

儒童王恩掄妻張氏年十七恩掄死整容辭舅姑拜於柩前曰夫死義無獨生婦將從恩掄於地下遂自刎救之不及乾隆元年獲表

監生胡志宸妻穆氏明敏知大義夫卒欲求死以舅老而子幼故力爲其難事舅生卒皆盡禮教二子成立每以勿墜家風爲勗學士題其門有節婦兼成孝婦慈君竟是嚴君之句蓋實錄也乾隆二年獲表

直隸秦州新志

卷之十八 人物下

三

蒲本育妻王氏夫亡撫孤勤儉持家教子成立守節三十餘年無懈弛乾隆六年獲表

庠生呂煜妻蒲氏早寡孝事舅姑一子幼且多病百計護持之得成立讀書爲諸生乾隆八年獲表

蕭續韶妻王氏韶死時有祖母孀居年八十五其弟妻又瞽也王守節以善女紅自給仰事俯育俱得其所鄉黨無間言乾隆八年獲表

鄧永清妻龐氏初相夫事姑最孝及姑歿夫亦卒嚴課二子詩書俱入泮終身不履外庭不華服乾隆十



一年獲表

蒲本香妻孫氏夫死時舅喪未殯而祖姑與姑皆篤老遺孤方稚乃慨然皆以爲己任祖姑不能嚙活以乳凡力舉三喪教子茂入州庠乾隆十一年獲表  
李人傑妻蒲氏夫亡求死舅姑以身老孫幼止之乃移居鄉村盡力孝養堂上餼旨甘而身及子乃皆粗糲二老以壽終喪葬如禮教其子亦能成立乾隆十三年獲表

王宗克妻南氏喪夫守節遂樸素終身教其子讀書

直隸秦州新志

卷之十 人物下

三

於已側督之嚴早爲州諸生乾隆十四年獲表

張安妻周氏早寡家甚貧躬紡績以事衰翁並營其喪葬鄉人憐之乾隆十四年獲表

翟尚禮妻楊氏翟家貧楊孝事孀姑相夫治家甚勤力姑與夫相繼歿楊拮据營葬守節以終乾隆十九年獲表

王家士妻楊氏家士早卒而其父尚在楊營葬其夫三年未嘗釋衰於其舅生養死葬亦靡缺乾隆二十五年獲表



李景旭妻張氏夫本農民氏年二十一歲而寡上事翁姑撫育二子長者教以農業次子習儒督之極嚴守節三十餘年獲表

董竒芳妻白氏二十八歲孀居善事翁姑撫成二子後皆有聲庠序守節四十七年獲表

楊廷輔妻何氏二十二歲夫亡撫子成立兼事翁姑及獲表時已守節四十二年矣

雷重普妻王氏夫亡氏年二十三觸棺毀面以自誓常忍饑以奉翁姑教子成名四十年苦節已獲表

直隸秦州新志

卷之十 人物下

三

郭根保子妻雷氏與夫賃住張迎吉房一間迎吉乘其夫出圖姦不從致被殺死事白迎吉立斬雷氏

特旌此乾隆二十三年事也

周爾溥妻萬氏二十八歲夫亡遺子衍烈並二女俱幼氏織紡撫孤或數日不舉火終無怨言卒年八十有一衍烈貌寢而嗜學邃於易尤工針灸有無子者千里延之針法不再試輒應期生子焉

劉端妻王氏夫亡時氏年甚少人勸之嫁指遺腹爲誓果生子遂守節至今



劉崧妻蕪氏早寡守節孝養舅姑皆壽終營其喪葬  
悉如禮雖素號知禮者無以議之乾隆二十五年獲  
表  
楊新才妻趙氏才死趙猶少矢志不貳孀居數十年  
人無間言里黨共舉之亦已獲表

劉秉乾妻張氏自二十六歲守節以至於老教子适  
能有成鄉里欲舉其節氏曰吾行吾志非以爲名也  
不肯

王瑛妻王氏年十九而寡撫子師禹至於成立歷數  
直隸秦州新志

卷之十 人物下

二四

十年矣其節寔有可稱者衆舉之辭曰從一而終我  
自覺根於天性今以邀榮則似有所爲而爲之者議  
乃寢

夏必選妻陳氏自康熙四十八年夫亡守節至乾隆  
十四年已歷三十載艱辛備嘗其志愈勵里人亦欲  
舉之未果

伏羗舉人鞏敬緝妻蒲氏州進士珩之孫監生恪女  
也適鞏克修婦道敬緝隨父建豐之滇南督學任卒  
於路訃至氏慟絕者數四妯娌撫慰誓不獨生乃奮



身墜樓手足俱折不死家人防衛之比柩至乘間自  
縊遂合葬焉

候銓州判馮景文妻貞女張氏順天大興人寄居房  
山縣父文傑康熙末爲江南太和令以之許字海州  
牧超子景文則秦人也超後罷官居長安文傑已先  
卒歸孀於房雍正十年春超遣其子如房贅焉屬道  
病比至甫一日猶未婚卽死時氏年二十三奉寡母  
授幼弟書怡怡如也聞之立脫簪珥服衰出哭欲從  
死母止之不得防之急致書超超諭止之求死益力

直隸秦州新志

卷之十八 物下 二五

謂母曰必欲兒勿死者非從柩歸不可乃使其弟送  
之長安與柩俱至翁姑痛矜之聞者莫不感動也後  
復歸秦近墓而處斗室自爨傭鍼咍稗焉耳苦爲夫  
再立後又撫一女資嫁之今且子然老矣人未有見  
之者於戲貞哉

胡景賢妻李氏年十八而寡遺腹生子洲撫之成今  
抱孫矣然親族中亦罕有見之者所居一小樓寒暑  
不下里中婦以迎賽喧鬪爭相覷或呼之亦不應也  
其母家故在城自夫亡後絕跡未一至云



諸生羅萬鏞妻李氏康熙初逆變肆掠民人皆竄匿  
李扶其姑馬氏併攜其女避兵深山猝遇賊皆自投  
崖下死此亦可謂之三節然前志未之及惜其湮沒  
故附記於此

秦安縣

生員蔡曰乾妻周氏年二十七歲夫亡翁老子幼一  
肩任之俯仰均得其力苦節三十餘年二子俱成立  
雍正三年獲表

生員蔡曰康妻張氏年二十八歲夫亡無子惟妾楊  
直隸秦州新志

卷之十 人物下

三

氏有孕張日禱於神冀生子果得男遂自乳之愛勝  
已出守節三十餘年雍正三年獲表

生員張懷光妻龐氏二十七歲夫亡投繯幾絕以救  
得免躬操井臼奉親撫九歲孤孩至於成立年逾六  
旬雍正三年獲表

儒童路灝妻孫氏年二十六喪夫無子欲以死殉念  
孀毋無依撫猶子以承祀甘貧苦守四十餘年奉姑  
九旬壽終雍正三年獲表

吳順姬妻李氏年十九夫亡無子育兄子承祧苦節



終身壽七十三歲獲表

趙清望妻鄧氏年二十生一子名思春甫八月夫賈易不知所往氏衣不完食不飽撫之成立垂五十年壽六十有七

何洛瑞妻楊氏年二十二而寡子嶢僅二歲矢志撫孤及嶢亦夭與其媳安氏撫孫如信姑媳俱獲表  
桑成章妻姚氏二十六歲夫亡遺子繡衣甫三歲茹苦撫之教以讀書遂入泮年七十有餘

李漢生妻成氏二十歲守節撫子四十餘年

直隸秦州新志

卷之十 人物下

三七

伏氏鄉民龐漢馥漢秀母也躬親稼穡撫成二子龐楫妻蔡氏苦節撫子入泮而夭復撫孫焉

侯普德妻蔡氏夫死不嫁守節終身已獲表

王肇光妻宋氏厲志守節莫能奪其操亦已獲表

增生張翔妻何氏二十四歲守節至八十獲表

成育芊妻王氏甘貧守節晚年獲表

蘇魁妻趙氏守節四十餘年已准鐫碑開載入志

張辨侍女白氏父以辨葬其妻納爲婢氏年十五鞠其主之孤子遂不適人今已符年例具詳矣



路道庸妻李氏相夫事瞽母而道庸復病癱婉轉二  
患者之間雖孝子無以過既而又寡乃撫姪以承祀  
姪生甫一月百計乳哺之皆爲人所不能爲者  
儒士胡公洽妻安氏十八而寡遺孤秉彝方半歲而  
翁姑又老氏皆以針指活之心力俱瘁者三十餘年  
壽五十五

清水縣

庠生張金榜妻傅氏夫亡誓以死從人防之不能得  
及葬之夕遂自縊焉

直隸秦州新志

卷之十 人物下 六

儒童喬博妻張氏年十九喪夫撫遺腹享稀齡

生員車載經妻張氏亦十九而撫遺腹後獲表焉

陳俊妻白氏年踰二十喪夫守節撫遺子帝訓爲庠  
生

王子瞻妻雍氏少寡守節人咸敬之乾隆二年獲表  
雍止沂妻韓氏貧能守志以節終身已經獲表

雷發物妻甯氏夫死誓守勤儉逾常多有人所不能  
堪者已獲表

雍志誠妻李氏少而早寡卒全其節獲表



常世瑞妻李氏喪夫苦守人莫能堪而氏處之自若  
族黨中人咸加禮敬焉亦獲表

廩生馬篤生妻白氏其翁癸巳舉人鳳翔教諭也篤  
生早卒無子氏少而守節歷今四十餘年矣

禮縣

儒童劉元湘妻怡氏斷髮守節四十三年上事翁姑  
下撫幼子從不出閨門雍正七年獲表

生員楊鳳岐妻趙氏子歸未久姑亡氏日夕哭奠事  
之如生居無何夫亦死而翁病痿痺氏調藥供膳者

直隸秦州新志

卷之十

人物下

元

凡七載嘗曰吾代夫盡子職也年未三十而寡長子  
隆祚方六載次承祚甫三月撫之俱入泮

杜萬育妻何氏生三子夫死不嫁撫孤成立長子紹  
唐甫入泮又亡其妻李氏曰姑守吾夫我守吾子亦  
不嫁人謂之姑媳雙貞

薛遴英妻劉氏年二十而寡誓不改適偕姑媪趙同  
守孤幃子克繼庠生克緝廩生

劉光斗妻郭氏二十八歲夫亡撫六歲子漢基後入  
太學孫璠亦遊庠蓋四十餘年矣縣令旌之曰節壽



雙高

儒童呂葵芳妻劉氏年二十四無子夫死育姪銘爲嗣備嘗艱苦歷三十餘年銘得爲諸生已獲表生員劉顯嗣妻趙氏年二十七而寡一子九歲翁姑皆七旬事養靡缺後子嬉暨孫夢熊夢麟夢麒相繼入泮享年八十一人謂節孝之報云

朱永昇妻周氏二十九歲守節上事翁姑撫十歲子鎮夏貧不改節後高堂壽考已亦見孫焉

朱盞器妻王氏二十八歲夫亡子炳尚幼氏竭針指直隸秦州新志

卷之十

人物下

三

以奉翁姑爲子娶婦生孫年踰七十

鹿廷瑜妻王氏夫死家貧紡績度日自二十八歲守節至七十四歲卒孀居四十六年四子皆成立

拔貢趙宸諮妻劉氏二十九歲孀居一子方四歲繼姑有三子俱幼翁姑卒氏並撫成之

何應璋妻劉氏二十五歲夫亡遺腹生子一勵志苦守五十餘年壽七十有六

生員劉臺彌妻楊氏年二十七而寡上事翁姑下撫三子守節至七十六歲



鹿廷瑾妻徐氏自二十一歲守節至七十四歲又嘗  
逮事翁姑於貧苦萬難之日

廩生趙普巔妻劉氏於二十六歲撫六齡孤子成室  
入庠尋亦卒遺孫周歲復偕媳梁氏撫之其年七十  
五梁喪夫時年終二十三也

儒童陳上書妻王氏二十一歲守節事翁姑撫二歲  
子並繼姑幼子俱至成立年六十有八

儒童馬超圻妻薛氏二十八歲夫亡遺孤一歲矢志  
撫之家徒壁立善事翁及繼姑享年七十餘

直隸秦州新志

卷之十

人物下

三

楊廷棟妻趙氏夫卒氏年二十五子敬方六齡竭女  
紅以撫之成立壽七十有六蓋守節三十餘年矣

儒童魏玠妻劉氏二十二歲夫亡子方二歲撫之至  
六十一歲守節終身子一元已先入泮

生員楊亨妻怡氏二十五歲守節孝事翁姑備歷艱  
苦凡四十餘年子孫皆成立

石國錫妻高氏年二十一而寡遺孤石琦方三歲瑞  
纓兩月撫之成立艱苦四十餘年

楊芥妻薛氏夫亡時氏年二十八長子棲鷄五歲次



鵠二歲於極貧苦中撫之成名過八十三歲  
宸訐妻趙氏孀居三十九年教子成名撫女成家年  
六十有七鄉里欽之

廩生 紫魁妻 氏二十四歲夫亡長子六歲次四

歲苦志守節教子光萃成名

原板模糊  
缺以俟補

馬御擢妻祁氏三十三歲撫遺孤及長又早死遺孫  
駒方成名復死駒臨卒出鄉人貸粟券付其子生員  
文程悉還之人稱一門節義

馬思稷妻楚氏二十四歲孀居至七十七歲其於奉  
直隸秦州新志

卷之十 人物下

三

親教子之道皆無奉焉而所處者貧境尤難

生員何崑源妻馬氏二十一歲守節上事雙親下育  
二子皆以節孝稱之

馬建功妻鄭氏十九歲夫亡撫 孤子事翁姑躬勤  
織維年逾古稀人稱其節與孝兼焉

儒童楚稱藩妻趙氏二十一歲夫亡翁姑垂白子在  
襁褓奉親撫幼以節終年羣曰此巾幗丈夫也

薛修已妻潘氏繼室也十六而寡翁姑在堂撫前子  
與已子無異承顏順志雖百苦無怨詞後二子俱成



立其節行誠有足多者人或傳其剜股奉親云

謝鴻妻蘓氏謝禮妻杜氏謝謙妻王氏皆少寡妯娌間同志苦守孝事翁姑撫子成立人稱謝門三節

生員蘓澤沛妻陳氏二十四歲夫亡子尚幼遺腹復生一子守志事翁姑教子彬入泮苦節四十年有女中君子之目

生員韓良翼妻馬氏年二十八孀居教子瓚入庠復蚤卒遺腹生子世德氏復鞠之成蓋兩世孤兒皆賴其力用能不墜家聲爲功鉅矣

直隸秦州新志

卷之十 人物下

三

徽縣

周彩妻馬氏彩有甥鎖克會佃種郭瑚之田彩夫婦移居同種會彩故瑚闢氏少欲娶之強立婚約氏赴深山縊於樹事發郭抵罪馬氏

特旌

生員鄧際泰妻石氏夫亡欲從死夢夫謂曰死節易守節難汝盍爲難者翌日述語人遂以奉親撫孤爲已任垂五十餘年人無間言乾隆九年獲表

生員袁咨訪妻趙氏年二十五咨訪卒家貧姑老氏



矢志奉親茹苦鞠子以節終焉乾隆十年獲表

生員程秉仁妻蔣氏夫亡幼子在抱翁姑已老氏方二十二歲剪髮自誓孝養靡缺育子成名乾隆十一年獲表

生員周宏典妻高氏矢志守節事姑誠敬無僞幼子賴以成立其夫死時氏纔二十三歲乾隆十一年獲表

童克祥妻張氏年十九克祥卒翁姑衰老子尚幼張躬紝績以養親課子成名苦節四十餘年乾隆十五年獲表

直隸秦州新志

卷之十

人物下

三四

廩生張聖化妻楊氏化早死氏痛其亡欲殉不果訓子成立以壽終

生員杜士奇妻韋氏蜀賊侵徽其夫被害氏尋獲其尸葬之力貧撫二子以壽終長子入泮

生員范應龍妻賈氏少寡紡績度日教子極嚴三十年如一日人咸稱之

張秀姑監生子隆之女年十六許字邑人王某某以竊繫獄女聞之七日不食其母及伯叔多方慰解之



惟涕泣不言乘夜靜投繯自縊死時乾隆二十六年九月二十三日也縣令李兆錦爲之勒碑於墓

兩當縣

庠生史策妻降氏年十九策卒守節撫孤子元直入泮乾隆二十二年獲表

庠生左士俊妻羅氏年二十士俊卒矢志不嫁撫子必顯更名入泮乾隆二十二年獲表

儒童降元職妻鄒氏二十五歲守節惟憑織布以奉舅姑舅姑或不忍其苦終弗輟也撫二子長者毓英

直隸秦州新志

卷之十 人物下

三五

甫八學列首名未張案而卒於州城學使者聞其寡婦子與之棺並奠而誄之州爲歸其柩六學之與試者哭而送之無不爲其母哀也然母且強自寬又方勗其次子云次子各菁英

右凡一州五縣已獲

旌表節烈除志乘卷宗炳列者俱經詳查備錄外或歷年旣久原卷損蝕漏未開造亦不能保其必無也其未符年例諸人間有附載

直隸秦州新志卷之十人物下終



